

AND NOW زمان

حلقات برنامج اذاعي
قدمته الفنانة **نشوى مصطفى**
على راديو مصر



تأليف

هناء محمود

رؤى كمال

زمان اند ناو

ل

رؤی کمال

هناء محمود

جميع الحقوق محفوظة © عصير الكتب للنشر الإلكتروني

<http://book-juice.com>

زمان اند ناو

تأليف : هناء محمود

رؤى كمال

نشر في : يناير ٢٠١٥



زمان اند ناو ...

لغز في حياتنا مش قادرين نفهمه , الدنيا بتمشى بينا لقدام وعقولنا بتفكر دايمًا في اللي كان ..
ريجة الماضي حوالينا , أصوات ضحك طفولتنا لسه في ودانا , مهما شوفنا إختراعات وافتكاسات ,
ونت وشات ..

لسه العروسة القماش ليها تأثير السحر علينا , لسه الفانوس أبو شمعة هو فرحة رمضان ..
لسه فاكرة حكايات جدتي , وسامعة صوت الشتا من ورا الشباك , وانا نائمة في حضنها ..
فرق كبير بين زمان ودلوقتي , اللي عايش دلوقتي شاف حاجات كتير اوى في الحياه , بس اللي
عاش الحياه بجد عاشها أيام زمان ..

إهداء خاص للفنانة الجميلة والإنسانة الرائعة **نشوى مصطفى**

كان أدائك الرائع وروحك الجميلة بمثابة القلب النابض لتلك الكلمات

البرنامج الإذاعي **زمان اند ناو** - رمضان ٢٠١٤ - راديو مصر

الحب ...

هناء محمود

لما نسمع حكايات جدتنا عن زمان وحب زمان وازاي هي شافت جدى وحبته نلاقى المشربية هي اللي كانت الوسيط في الحب والقللة هي الحجة اللي من غيرها مكنتش تعرف تفتح المشربية وتبص عليه الصبح وهو معدى رايح شغله و لابس البدلة الرسمية كأنه عريس يوم فرحه ونافخ طربوشه ومسرح الشرشوبة ويص عليها بطرف عينه ويعدل الطربوش

والغريب انهم كانوا ممكن يفضلوا على النظام ده لمدة شهور او سنين وكان بيكفيهم .. ولو الحظ ساعدهم والدنيا ضحككتلهم ممكن يشوفها وهي رايحة تشتري البهارات من عند العطار ويعمل اى حجة علشان يعرف يبصلها كويس ويدقق في ملامحها اللي اتعود يشوفها من بعيد وهي طلة من المشربية

وياااسلااا لو اللقاء ده انتهى بابتسامة خجولة من حبيته من غير حتى ما يسمع صوتها ويمكن كمان ميعرفش اسمها ايه ولا هي تعرف اسمه

بس الغريب ان الحاجات البسيطة دى كانت تقدر تخلق بينهم الوعد بانه مش هيحب غيرها وبانها هتستناه

ولو الحكاية تطورت شوية تبدأ محاولات ارسال الجوابات اللي بيعملوا البدع علشان يوصلوها لبعض ممكن يفضلوا حاطين الجوابات في جيبيهم ليل نهار لحد ما تيجى الفرصة ما هما ميعرفوش البهارات هتخلص امتي علشان تقدر تخرج تانى من البيت ؟

, واول ما تيجى الفرصة دى يقوم الشاب الوسيم مطلع المنديل من جيبيه فيقع الجواب على الأرض

تقوم الشابة الجميلة الخجولة مستنياه لما يبعد شوية وتوطى تاخذ الجواب وهى بتبص شمال ويمين
كأنها معها ممنوعات او منشورات سياسية وعلى البيت عدل ومن باب البيت على اوضيتها بعد ما
ترمى السلام على نينة وتبوس ايديها وهى فرحانة , وبعدين تقفل باب اوضيتها وتفتح الجواب وهى
قلبها هيقف من كتر الدق وتقرأ الجواب حرف حرف وكلمة كلمة ويمكن تحفظه كمان وتحطه على
قلبها وتنتهد وبعدين تخبيه فى الشكومية جوا الدولاب

حتى كلامهم فى الحب زمان كان مختلف كان بيوصف شخصيتهم الجادة ونظرهم الاحترمة لبعض ,
فاكرين كلام عماد حمدى لفاتن حمامة فى فيلم بين الأطلال

وأنت .. أنت يا توأم الروح .. يا منية النفس الدائمة الخالدة .. يا أنشودة القلب فى كل زمان
ومكان .. مهما هجرت .. ومهما نأيت .. عندما يوشك القرص الأحمر الدامي على الاختفاء ارقبيه
جيذا .. فإذا ما رأيت مغيبه وراء الأفق .. فاذكريني .. اذكريني

طبعا احنا دلوقتى محتاجين ترجمة للكلام ده أساسا مخنا مبقاش قادر يستوعبه واتحول بالنسبالنا من
كلام رومانسى لمقطع كوميدى بيضحك

طيب فاكرين جواب فاتن حمامة لعمر الشريف فى فيلم نهر الحب

اليوم الثالث من الشهر الثامن بعد رحيلك مضيت اليوم مع والدتك ولقد وجدتها بالمستل فى الحديقة
ترعى زهور حبنا النادرة وتحذر الجنابى من ان يقتطفها احد حتى تعود انت ورغم ذلك اهدتنى
اجملها قائلة اصبحتى فى منزلة ابنى خالد

يااااسلاااام حتى الحموات كانوا رومانسيات وجدت حماكما فى المشتل فى الحديقة بترعى زهور حبهم
النادر مش فى المطبخ مثلا بتطبخ الكوارع وقالت لها كويس انك جيتى يا بنتى علشان أعلمك ازاي
تعملى الكوارع لخالد ابنى اصله ييموت فيها

أصلنا خلاص بقينا فى زمن السرعة هما لسه هيصيعوا وقت ويقعدو يسقوا الورد .. لأ تعلمها حاجة

تنفعها لما تتجاوز ابنها

زمان كان المزاج رايق والبال مرتاح والدنيا مش زحمة زى دلوقتي

دلوقتي لو ولد شاف بنت وعجبته فى الشارع او فى الجامعة او فى فرح واحد صاحبه خلاص مبقاش ضامن يشوفها تانى , لازم يستغل الفرصة ,, اى نعم هو مش ضامن هيجبها ولا لأ بس اهى عجبته من اول نظرة وفى احتمال بنسبه ٣٠ فى المية انه ممكن يجبها فليه يضيع الفرصة

, هوبا يروح يكلمها باى حجة او يخلى واحدة صاحبه تعرفوا عليها ومن اول لقاء يعرف اسمها وعنوانها وقصة حياتها واكاونت الفيس بوك بتاعها واول ما يروح البيت بيعتلهها آدد , ماهو بردو مش بجح اوى انه يطلب رقم تليفونها من اول يوم الدنيا لسه فيها خير , ممكن تانى يوم ياخذ رقم تليفونها علشان الموضوع بيقا منطقى وتالت يوم بقا يتقابلوا , ماهى البنت هتقدر دلوقتي تخرج عادى بحجة انا رايحة عيد ميلاد صاحبتى سوسو او انا رايحة اعمل شوبنج مع صاحبتى توتو

الولد مش محتاج حجج هو اصلا طول النهار والليل برا البيت عادى

يقعدوا الاتنين فى الكوفي شوب يا اما هو يدخل فى الموضوع علطول ويقولها انا بجبك يا سالى اولو استنى ١٠ دقائق ومدخلش فى الموضوع سالى تنجز وتساله أنا ايه بالنسبالك يا حسام ؟

والاتنين يقرروا يبقو مرتبطين فى حكم المخطوبين يعنى بيخرجوا مع بعض وطول الليل بيتكلموا فى التليفون بس الفرق الأول بينهم وبين المخطوبين ان البلد كلها تعرف ماعدا أهلهم , والفرق التانى ان المخطوبين بيبقا عندهم احتمال ٩٩ فى المية انهم هيتجوزو بس سالى وحسام المرتبطين لو جادين شوية ممكن يبقا احتمال الجواز عندهم ٢٠ فى المية ولو لسه مش متأكدين يبقا مفيش احتمال اصلا أهم مرتبطين على ما تفرج

اتعلمنا فى حياتنا ان اللى بيحى بسرعة يروح بسرعة وهو دا الفرق بين زمان ودلوقتي , زمان كانت كل حاجة على مهلهم حتى الماشية والكلام والسلام . والحب كان على مهلهم كانوا بيتأنوا فى كل

حاجة كان الوقت فيه بركة والنفوس هادية وراضية , دلوقتي كل حاجة بقت بسرعة بتكلم بسرعة
بنمشي بسرعة بنضحك بسرعة وبناكل بسرعة وحتى بقينا نحب بسرعة قراراتنا بقت سريعة علشان
كدة بقينا بردو بنندم بسرعة

هنفضل طول عمرنا نتحسر على بركة زمان وحب زمان وناس زمان بس هنقول ايه عاوزنا نرجع
زى زمان قول للزمان ارجع يا زمان

الجواز ...

هناء محمود

زمان أول ما كانت البنت تتولد وهى لسه فى اللفة تتحجز لإبن عمها وتبقا فى مشكلة كبيرة لو ليها ابن خالة كدة ممكن يحصل مشاكل اشمنى ابن عمها وخالتها لأ , ويادوب البنت تخلص التوجيهية وتلاقى ابن الجيران متقدملها وتبقا محتارة طيب ابن عمى ولا ابن خالتى ولا ابن الجيران وساعتها بقا القلب وما يريد , غالبا بيكون ابن الجيران

وتقعد فى الكوشة فى فرحها وفى شابين او تلاتة فى الفرحة قلبهم مكسور ياعينى وواقفين يغنوا غالى عليا غالى عليا ويعيطوا

ولو فى بنت تانية جوازها اتأخر شوية ووصلت من العمر أرزله وكملت ال ١٧ سنة ولسه متخطبتش , بيقا مفيش غير حل واحد , ماماتها تروح لأم شمر الخاطبة تديها صورتها وتقولها شدى حيلك وليكى الحلاوة , وبعد يومين تلاتة تلاقى بدل العريس خمسة وهى اللي تنقى كمان

أما لو بنت دخلت الجامعة وأصرت انها متتجوزش الا بعد ما تخلص تعليمها , كدة تبقا عنست ومستقبلها ضاع وفاتها قطر الجواز , وليل نهار تسمع من مامتها : امتى هتعلقى يا بنتى , شايفة سحر بنت الجيران بقا معاها عيال طولها وحامل فى العيل التالت وانتي لسه مضيفة عمرك فى المذاكرة والكلام الفارغ , يا بنتى نفسى افرح بيكى قبل ما أموت

وللأسف بتتجوز كبيرة فى السن وهى عندها ٢١ سنة لشاب أكبر منها بكثير عنده ٢٥ سنة

علشان زمان كانوا بيتجوزوا صغيرين كانوا بيبانو جب أولادهم كأنهم أخواتهم الكبار مش أمهاتهم , بس بصراحة زمان كانت البنت بيقا عندها ١٥ سنة ومتحملة مسئولية بيت بحاله , عاقلة كدة

ورزينة وسابقة سنها شكلا ومضمونا , يمكن دا اللي كان بيخليهم يتجوزوا بسرعة
دا غير بساطة متطلبات الجواز وقتها , ومكنش فى أزمة سكن زى دلوقتى , الشقق كانت كتير
وواسعة وشرحة وبرحة وترد الروح واللى بيدور على شقة يلاقى بدل الواحدة عشرة
الولد كمان كان اول ما بيتخرج بيلاقى الشغل مستنيه وفاتح دراعاته دا لو كان عاوز يشتغل
بالابتدائية كان بيلاقى شغل
علشان كدة الجواز مكنش فى أسهل منه , فرعين نور فى الشارع ورقاصة من بتوع زمان ويانجف
بنور يا سيد العرسان وتخلص الجوازة
انما دلوقتى بقا النجف كريستال مش بنور , والرقاصة بتاخذ فى الساعة ٢٠٠٠٠ ألف جنيه ,
علشان كدة العروسة واصحابها هما اللي بيحيو الفرح توفيراً للنفقات
دلوقتى البنت اللي بتتجوز بعد ما تخلص تعليمها مباشرة , بيتقال عليها بنت محظوة
ماهو الزمن اتغير والدنيا اتلخبطت , والبنت وهى فى اللفة بقو بيكرم شولها خمسين جنيه ويقولوا
لمامتها اللي جابلك يخليلك ويدوروا وشهم ويروحوا
ماحنا لو بصينا فى اى عيلة دلوقتى هنلاقي ٥ بنات ملهوش غير ابن عم واحد , طيب هيتجوز مين
ولا مين !?
وابن الجيران ساكن فى عمارته ٢٠ بنت عينهم عليه , طيب ايه الحل
وأم الولد فى زمانا ده بتفضل تمشى مصالحتها فى الحياة عن طريق الجملة السحرية ربنا يخليكى ليا يا
عروسة ابني , اللي بتقولها لنص بنات البلد , بس الكارثة بتحصل بقا لما بيحى اليوم اللي ابنها
يجيلها عروسته اللي بجد , تقريبا مبتخرجش من بيتها تانى علشان متفرمش , وان خرجت بتخرج
متنكرة

أما ام البنات بقا بتدور على اى مناسبة أو فرح علشان تحط بناهما فى فاترينة العرض , يمكن تلتقط عريس من هنا ولا من هنا ولا تعجب أم عندها ولد لسه مش مرتبط

بس حتى دى بقت معجزة نادرة الوجود , ماهى ظروف الشباب اتدهورت , دلوقتى الشباب عما بيخلص تعليم وجيش ويدور على شغل ويشغل أو حتى يسافر برا ويكون نفسه بيكون عدى ال ٣٥ سنة دا لو مكانش ال ٤٠ , ولما يجى يدور على عروسة بيدور على عروسة صغيرة تحت ال ٢٥ سنة لأن اللي فوق ال ٢٥ فى نظره عنست خلاص , وطبعا البنوتة اللي تحت ال ٢٥ ما بتصدق ايه يعنى عريس عنده ٣٥ أو ٤٠ سنة , أهو عريس يا امى حد لاقى فى الزمن ده خيال عريس حتى

ودا اللي بيخلي بنات كتير يفوتها القطر وبنات أكثر بيدوسها القطر وهو معدى , ومبيقاش قدامهم غير آخر حل متبقى

وهو الخاطبة ,, أيوة الخاطبة الحديثة خاطبة آخر زمن , المتمثلة فى مواقع الشات والتواصل الاجتماعى و مواقع الجواز أون لاين

بس فرق كبير أوى بين خاطبة زمان ودلوقتى

لأن خاطبة زمان كانت عارفة كويس مين العريس اللي عاوز يتجوز بجذ وناوى على الخير , وهيدخل البيت من بابه

بس عريس دلوقتى بقا بيدخل البيت من شاته , ومن تليفوناته , والباب ده آخر حاجة بي فكر فيها , دا لو فكر أصلا

وساعات لما بي فكر يدخل البيت من بابه بيتقاله ورينا عرض كتافك وبتزرع الباب وراه , لأنه مش بيكون أد المسئولية والثقة

العنوسة بقت ظاهرة لا يمكن انكارها او تجاهلها فى زمانا ده , بسبب ظروف الحياة والعيشة , زمان العنوسة كانت بتبقا اهانة كبيرة اوى فى حق البنت لأنها كانت نادرة ومكشس ليها أسباب فكان

السبب المنطقي وقتها ان أكيد البنت دى فيها عيب

انما دلوقتي نلاقى البنت زى القمر ومتعلمة ومن عيلة محترمة وألف مين يتمناها ووصلت لل ٣٠
ولسه متجاوزتش ويمكن متقدملهاش ولا عريس , العرسان بتتقرض واللى متبقى منهم نصهم مش
عارف يتجاوز بسبب الظروف

طيب نعمل ايه , ناخذ نص بنات دلوقتي ونعملهم بعثة ويسافروا بآلة الزمن لأيام زمان يتجاوزوا
ويستقروا هناك واهم يخففوا الحمل شوية من هنا يمكن البنات الباقيات تتفك عقدتهم
ولا نسلم خلاص بالأمر الواقع ونقول كل شئ قسمة ونصيب , ومتستعجلوش على الجواز يعنى
خدوا ايه اللى اتجاوزوا ,

انا شايفة ان فى زمانا ده مينفعش اى بنت تحلى الجواز هو هدفها ويس , عندك حاجات كتير اوى
تقدرى عملها , الدنيا مش هتقف علشان لسة متجاوزتيش , متقضييش عمرك مستنية فى محطة قطر
الجواز ويا عالم القطر يجى ولا لأ , ويمكن يجى وميقفش , ويمكن يقف وعلشان انتى مستعجلة تندمى
تانى انك ركبتيه وتقولى ياريتته فاتنى وياريتنى ما استنيتته

وفى الآخر هى دنيا ومحدش بياخذ فيها أكثر من نصيبه سواء كان زمان ولا دلوقتي

رمضان ...

رؤى كمال

هل هلالك شهر مبارك ويعود علينا الايام بالخير والبركه .. ده اجمل شهر فى السنه شهر رمضان

ياااااااااااا رمضان رمضان ايام زمان لما كنا صغيرين كان ليه طعم تانى خالص

كنا نفضل من قبل رمضان بايام بنحضر ليه ونزل على اول الشارع عشان نشوف الناس وهى
بتنصب الشادر لمائدة الرحمن

وعلى الناصيه التانيه عم على ببني فرن الكنافه عرفينه حاجه كده زى دايره كبيره محطوط عليها
صاجه مدوره X

وبيملى الكوز كنافه ويسويها على الفرن ده

وجب منه فرن تانى صغير شوية طوب مرصوص جب بعضه ومحطوط عليه صاجه بس مربعه

ودى بقى عشان سيد صبى عم على بيعمل عليها القطايف

ولازم كل اولاد الحته يتجمعو ويعملو زينه رمضان من ورق الجلاذ القديم الملون

وتلاقيه متوصل بين البلكونات كانه بيعلن وقت الاتحاد كلنا روح واحده

كلنا مسلمين وحتى لو كان الجار مسيحي وتلاقيه واقف قبل المسلم بيعلق الزينه

وياة لو بابا اتاخر فى انه يجبلنا

الفانوس الصاج ابو ازاملون ابو شمه عارفينه (هههه ما اظنش)

الى غالباً" كان لازم يحرقلنا صوابنا

من كتر ما كان بيكون سخن

ونلف على اديه حته قماشه عشان ما يلسعناش وبردو يوم والتانى القماشه تتحرق من الشمعه وبردو
يلسنا

كانت احلى ايام لما جارتنا فى اول يوم رمضان تطلعنا طبق المخلل الحامى الى عملاه

وجارتنا التانيه تزل علينا بطبق البسوسه الى بالقشطه

الى بيقى هابين علينا نفطر بس عشان نذوقها

ويفضل الباب يخبط وكل جار مودى لجاره طبق

لحد ما تلاقى الترايزه مليانه اطباق اشكال والوان ونصها مش ماما الى عملاه

وطبعا ماما قائمه بالواجب مع كل الجيران لحد ما فى الاخر الاطباق تنوه ونبقى مش عارفين دى
اطباق مين

مهى اطباق دايره على البيوت تجرى ريق الصايمين

ولازم كل الى فى البيت يتلمو على الطريزه وقت الاذان ونفطر اول ما الاذان ياذن

وبعدھا نقوم نصللى وبابا يتزل للتراويح

واحنا نقعد مستين الفوازير وتلاقى البيوت كلها خارج منها صوت واحد وعلى حسب

سنه كانت تكون شيرهان وسنه نيللى

ومن اول حلقه كنا نحفظ تترالفوازير وتانى يوم نسمعه للاصحابنا

او يخرجو يتسحرو بليل في مكان الى عامل برجرام للسحور ,, حاجات ولا كنا نسمع عنها زمان
وتلاقى الام هتموت عليهم من القلق ماهو الشارع مابقاش امان زى زمان
بقى الى بيحصل فيه يشيب

و التلفزيون في ٢٠٠٠ مسلسل من كل الاشكال والالوان وكلها مافيهاش متعه حلقه واحده من
فوازير زمان

وتفضل تقلب بين القنوات تشوف حته من هنا على لقطه من هنا

بقا تيلفزيونا زحمة زى حياتنا بالظبط

هيحصل ايه يعنى لو حاولنا نرجع ليلية من ليالى زمان

حاولنا نراجع نفسنا ونسأل على ناسنا وأهلنا

طيب تعالوا نسأل نفسنا وأنا معاكوا ..

لو متجمعناش مع بعض في رمضان يبقا هنتجمع امتي

لو مسألناش على بعض في رمضان يبقا هنسأل امتي

لو ماتصالحناش مع نفسنا ومع الناس في رمضان هنتصالح امتي

يلا كل واحد يدور في دفاتره وانا اولكم ويشوف مين اكثر واحد هتسعه اوى كلمة كل سنة
وانت طيب منه ويقولها له بسرعة

كل واحد يفتح تلاجته ويقسم لقمة مع حد محتاج , علشان يقسم معاه سعادته

يلا ندور على فوانيس زمان ونعلقها, ونعمل بإيدينا زينة زمان ونرميها على بلكونة الجيران

ونساعد بعض واحنا بنغنى يا بركة رمضان خليكى خليكى فى الدار

يا بركة رمضان هلى خلى دارنا عمار

و انا مش هنسى اقول لكل الناس الى يسمعونا

كل سنه وانتم طيبين وعلى الحب متجمعين فى شهر البركة والخير

ويارب ترجع لمتنا الحلوه من تانى

وتفضل مصر بلد الامان والحب والاخاء لكل المصريين

المعاكسات ...

رؤى كمال

كانت البنت تخرج من البيت ليل نهار ما فيش عين تترفع فيها ولو شاب حب يبص عليها يبص
بطرف عينه من تحت لتحت بجنباسه ولو حد خد باله انه يبص يلطشه افى ويقله يا منحل ازاي تجرؤ
وترفع عينك على بنت معاديه

ولما كان الشاب من دول يكون شايف نفسه ونافخ طربوشه وعادل الزر على اليمين يتمشى
بخطوات بطيئه ويقف بالقرب من محطة الترام ويحاول بكل صفاقه انه يتكلم معاها ويتجرأ ويقولها
الصفيق بنسوار يا مدموازيل ممكن اتعرف عليكى

ولما البنت المؤدبه تبصله بنظرة احتقار يحط وشه فى الارض ويجعل من فعلته الشنيئه ويا ويله لو احد
الماره شاف الموقف الفظيع ده ممكن يتجر على الكراكوون ويتحبس فيها للتطاوله على المودموزيلات
فى محطات الترام

واحتمال ساعتها يتحبس كام يوم لحد ما يجى حد من عائلته ذو شان مرموق ويخرجه من الكراكوون
بعد ما يديله درس فى الاخلاق ولما تطور الامر شويه والبنات بقيت فى الجامعات كانت البنت
بتخرج لابسه المينى والميكروو وقاعده جمب الاولاد فى المدرج وما فيش واحد يتجرأ يرفع عينه على
واحد زميله ولو استلف منها ككشكول المحاضرات تبقى مشكله وزمايله يوبخوه على انه بيعاكس
زميلاته

زمان المعكسات كانت راقيه عباره عن اطراء لجمال البنت يا جميل يا أرض احفظى ما عليكى .. يا
قمر

حتى ما بصتتش ناحيته

ولو كان حظها اخبر وركبت اوتوبيس تبقى مصيبتها سوده ولازم تقرا قران عشان ربنا يحفظها
وتتزل من الاتوبيس سليمه بدون ما تنهشها الذئاب البشريه
ده كله بالنهار انما ليليل الوضع بيكون اسواء من كده اضرب في ١٠ ويمكن نكون مزوديين شويتين
ويمكن نكون مخففين ٣ اربع شويات

بس الاساس ان زمان على الرغم ان كان في معاكسات لكنها كانت راقيه وماكنش في حاجه ان
حد يقول وانا مالي كله بيتحرك عشان واحده بتتعاكس

انما ناوووو لو الشارع مبدور رجاله والبنه حد بيترازل عليها او حتى بيتحشر بيها تلاقى الكل
واقف يتفرج وبيقول و انا مالي خاليني في حالي تصدقوا احنا عاوزين نطلع قانون نطالب برجوع
تحرشات زمان لما كان المتحشر وقتها انسان مش عباره عن حيوان وتخفى في صورة انسان مع
الاعتذار طبعا للحيوان

مقاييس الجمال ...

هناء محمود

مع ان اختلاف أشكالنا وملامحنا وأطوالنا وألواننا هما أساس الجمال لأننا لو كلنا كنا نسخة واحدة من بعض مكنش هيبقا للحياه طعم , بس كان لكل زمن مقاييس جمال مختلفة عن الزمن التاني زمان كانت الست البيضاء المرربة إالى مالية مركزها دليل على انها متغذية و بنت عز ودا يفكرنا بالمعاكسة السينمائية المشهورة

يا صفائح الزبدة السايحة يا براميل القشطة النايحة , يا أرض اتمدى ما عليكى أدى

حتى ملامح الوش كان ليها مقاييس مختلفة , العين زى الفنجان المناخير أد النبقة والبؤ خاتم سليمان هو ده جمال أيام زمان

وكان مهم أوى طول الشعر يعنى اللي تفرط فى شعرها وتقصفه كأنها فرطت فى أنوثتها وعملت جريمة يعاقب عليها القانون

مكنوش لسه اخترعوا الشامبو ولا البلسم ولا حمامات الكريم , ولسه لحد دلوقتى اى واحدة شايفة ان شعر جدتها أحلى منها

كان زمان مستحضرات العناية بالشعر هى الجاز والسمنة البلدى وزيت الزيتون والحنة

كان المكياج عبارة عن حجر اسود يطحنوه ويحطوه فى مكحلة وتكحل بيه عنيتها وتقرص حدودها بإديها وتعضض شفايفها علشان تحمر وكده تبقا خلصت الميكآب بتاعها

وكان البرفان بتاعهم هو البخور والمسك

شوفتوا بساطة أكثر من كدة؟!

حتى لما بداوا يغيروا في مقاييس الجمال ويحاولوا يعملوا افتكاسات جديدة كان آخرهم يرسموا مثلثين صغيرين بالروج فوق الشفايف زى أسمهان ولىلى مراد ويغيروا في تسريحات الشعر ويعملوا أوصة شادية

وكانوا فاكرين نفسهم كدة مكسرين الدنيا , أصلهم مشفوش اللى احنا بنشوفه

ميعرفوش ان الست المرربة دى بقت موضه قديمه , وان الشفايف الكبيرة بقت من مقاييس الجمال ودا اللى خلى البنات مهوسيين بالأنظمة الغذائية والريجيم وعمليات التجميل

مكنوش يسمعو زمان عن البوتكس والسيليكون وعمليات الشفط والشد والنفخ

جمال دلوقتي بقا مزيف ومشكوك فيه , أو بمعنى أصح منفوخ فيه

حتى من غير عمليات تجميل , بالمكياج بس دلوقتي تقدر الواحدة تغير ملامحها

المكياج بقا طبقات إيشى فوندشن وكريم اساس وبودرة وروج أجو وكحل واى لاينر واى شادو وأه يانى وروج وملمع ومصنفر ومبيض محارة

حتى لون العيون بقا بيتغير باللينسز , والرموش بتتركب , والشعر بيتفرد بالكرياتين والبنت بقت تقص شعرها زى الولد وتقول دى موضه , والشعر الكيرلى والمجعد بقا موضه مع انه زمان كان عار

بيصعب عليا العرسان يوم فرحهم لما بيروحوا البيت وتغسل العروسة وشها من المكياج وتقلع اللينسز والرموش وتطلع الحاجات اللى حاشيها بيها الكوافير كأنو كان بينجد مرتبة

وفجأة يكتشف الحقيقة انه متجوز سامى ابن عمته , وعندها بتكون الصدمة بس خلاص لا مفر هتتباس يعنى هتتباس يا عباس

مش عارفة لسه ناقص ايه ؟ يمكن بعد كام سنة تتغير مقاييس الجمال وتبقا الموضه الست اللى بعين

واحدة ومناخيرها ٣ فتحات ومن غير بؤ خالص

ربنا يستر .. طيب لو اتغيرت المقاييس دى الناس اللى شفطت ونفخت وشدت هيعملوا ايه وقتها ؟

احنا ليه محيرين نفسنا ؟

طب منخلينا زى ما احنا بجمالنا الربانى اللى ربنا خلقنا بيه , إالى مقاييسه مش بتتغير ولا بتتأثر
بالموضة

ونهتم بجمال أرواحنا وقلوبنا علشان هو دا اللى بينعكس على وشوشنا ويخليها أجمل

إحنا محتاجين فعلا عمليات تجميل بس من نوع تانى

نفسنا فى عمليات تبييض قلوب وتطهير نفوس وتحسين عقول علشان نقدر نقبل بعضنا زى ما احنا
ياختلافاتنا ونشوف كل شئ حوالينا جميل من غير عمليات تجميل

الناس ...

هناء محمود

لما نقول ناس زمان يعنى فشارك سعيد يا بيه , بونجور يا مودموازيل , بنسوار يا هانم , مساء الخير يا نينة ,

أنا ممنون جدااا , تسمحيلى بالرقصة دى

لما نقول ناس زمان يعنى الناس الشيك يعنى الاتكيت , الأيافة واللطافة , يعنى الشاب رايح الجامعة لابس البدلة والكرافتة كأنه عريس ومسرح شعره على جمب كأنه لسه واخذ شاور , يعنى البنوتة الرقيقة اللى كلها أنوثة وجمال وخفه

يبقى التراس وفنجان القهوة , الأتوموبيل الأسود واقف تحت العمارة والشوفير بيفتح بابيه ويقول اتفضلى يا هانم اتفضل يا بيه .

يعنى صاحب المحل بعد ما الزبون يطلب طلباته يقوله تحت أمرك يا يافندم , بكل ممنونيه

لما نقول أهل زمان يبقا الشوارع الرايقة والأرض النضيفة , والنظام والإنسانية

يبقا التياترو والكازينو والرومانسية والحب

يبقا الحنطور والكورنيش , والصور الأبيض واسود ,

ناس زمان الناس الجدعان , اللى مينفعش يطبخوا طابخة من غير ما يدوقوا الجيران , مينفعش حد يقع فى ازمة وميلاقيش حواليه اهله واصحابه , يعنى بقال الأمل و حلاق السعادة وجزار الحبة وكله على

لما الطفل يلعب فى وسط الحارة ويلاقى ميت عين حارساه , ألف واحد يرجعه بين أهله لو تاه ,
أهل زمان هما الأصول والمفهومية و النباهة , هما الطيابة والحكمة والبساطة
أيام زمان يعنى الأكل الطعم والصحة الحلوة و الهوا النضيف , هى الطاقة والحيوية والمزاج الراقق
والقلوب الصافية

زمان كانت لمة العيلة هى الفسحة والفرحة , كان الصغير ييحترم الكبير والكبير يبرحم الصغير ,
كان لسانهم حلو ويبنقط سكر , حتى فى عز غضبهم كان آخرهم كلمتين لو سمحت الزم حدودك
يافندى

كان هيبقا احساس ناس زمان ايه لو عايشين معانا دلوقتى , لما يسمعوا فكك ونفض وفاكس ,ومش
حاطط ايدى على البلف وآخر حاجة

لما يشوفوا البنات المسترجلة والأولاد لابسين بناطيل سكينى وعاملين تسريحة عرف الديك , لما
يشوفونا واحنا بنط فى الأتوبيسات ونسطح على القطر , لما نشاور للتاكسى ويقولنا رايحين فين
وعلى حسب مزاجه بقا يا تركب يا يقولك مش فاضى

لما نروح نشترى حاجاتنا والبياع يقولنا انجز يا عم متخونقناش

بقينا نسكرن فى عمارات بالسنين ومنعرفش اسم الجيران , بقينا منسألش على بعض الا لو حصل
مصيبة وممكن نسأل بالتليفون وخلص

الدنيا بقت زحمة والناس مستعجلة مبقاش حد فاضى حتى انه يرمى السلام

زمان الناس هى اللى كانت بتسلى بعض وتونس بعض دلوقتى بقا فى كل بيت تيلفزيون ييلهى الناس
عن بعضها , حتى أهل البيت بقا كل واحد فى أوضته اللى بيتفرج على التيلفزيون واللى قاعد على

الكمبيوتر واللى بيتكلم فى التليفون

بقينا بنشيت أكثر ما بتكلم , بنبص فى موبايلاتنا أكثر ما بنبص فى وشوش بعض

لمة العيلة بقت موضة قديمة ودمها ثقيل , وتضيع وقت عن المصالح الأهم , راح زمن الجدعنة والشهامة وبقينا نتفرج على وجع بعض ومنحسش , ونقول يا عم كبر

بعد ماكانو الولاد بيلعبوا فى الشارع لنص الليل واحنا مش خايفين عليهم , بقا الولد بيمشى ماسك ايد امه وهى خايفة عليه راح الأمان زى ما راحت ايام زمان , الضحكة الحلوة بقت نادرة وغالية , واليوم اللى نضحك فيه من قلوبنا بنقول خير اللهم اجعله خير

الصغير بقا ينفذ للكبير والكبير بقا مش فاهم الصغير , الدنيا واخدة فى وشها و بتجرى واحنا حالفين نحصلها مهما نسينا وانا قيمنا ومبادئنا وأصولنا وياريتنا عارفين الدنيا واخدانا ورايحة على فين ؟ , أهو ادينا بنجرى و خلاص , ماهو الجرى رياضة بردو

متيجو نوقف الجرى شوية ونسيب الدنيا تجرى لواحدنا يمكن لما تبص وراها ومتلاقيناش ترجع لعقلها وتهدى شوية

وتعالوا نتصل بأصحابنا وحبائنا ونتفق على خروجة حلوة على الكورنيش وندور على حنطور من بتوع زمان ونقوله سوق يا سطفى وطير بينا يا قلبى ولا تقوليش السكة منين

ويا سلام بقا لو نختمها بدرة مشوى وشوية ترمس وحص الشام وركوبة فى النيل وقبل ما نسيب النيل نرمى فيه كل همومنا ونغسل بيه سواد قلوبنا علشان لما كل واحد يروح بيته ويحط راسه على المخده يجى النوم علطول وميتعززش علينا زى كل يوم

يلا نجرب ليلة واحدة نرجع فيها اللى كان ونقول لبعض والله زمان

أولادنا ...

رؤى كمال

ولدنا فلذاة اكبدنا

همننا ليا ونهار ونهار وليل

انا احيانا بسال نفسى هو ايه كان حال امهتنا زمان يا ترى كانوا بيعانو كده وبيطلع عنيهم لجرد

ان ابنها ولا بنتها تسمع منهم كلمة حاضر

انا فاكره زمان ان امهاتنا حباينا ربنا يخليهم لينا

كانو بيصحو الصبح هى كلمه واحده يلا اصحو هتاخرو على المدراسه

كله بيتنظر من السراير ويجرى على التويلت

ونلبس ونفطر ونترل وناخد سندوتشاتنا كل ده فى نص ساعه

كان آخر عصاينا بيكون على كوباية اللبن لما منقدرش نكملها كلها

ومن غير كلمه ناخذ السندوتشات الى بتعملهنا بدون حتى ما نسال ايه الى فيها

ولو فكرنا وسألنا يتقال هو كده السندوتشات المفيده جنبه بطماطم

والغريب اننا كنا بنقول حاضر

ونروح المدرسه ونرجع نعمل الواجبات بدون اى مساعده من امهاتنا ونقعد بعدها نذاكر او نلعب

عل حسب

اكيد ما كناش ملايكه وكنا بنتشاقى

بس بالمقارنة بأطفال دلوقتى يجوز يتقال علينا اننا كنا ملايكة

ياترى السر كان ايه ؟ هما كانوا بيسقونا الأدب والطاعة مع لبن الرضاعة؟!

حتى كنا فى لعنا هاديين مع انما كانت ألعاب محدودة وعلى أد الحال

احنا كبنات نلعب بالعروسة

نعمل مطبخ وناخد شوية رز على مكرونه ونخطها فى لعب المطبخ

او نطلع نلعب على السلم اولاه

كنا بنفرح بالشلن والبريزة ونبقى مبسوطين جداااا وفى منتهى السعاده لو اول الشهر بابا بيقشش
علينا

بربع جنيه لكل واحد ده بيقى يوم سعده ونستناه من الشهر للشهر ونصرف بريزة بس ونحوش
الباقى فى الحصالة الصفيح أو أم قفل صغير فاكرينها التحويش عندنا كان هواية

علشان نشترى مجلة سمير وميكي ونسلفها لأصحابنا

كنا عايشين طفولتنا بس كنا مؤديين ويمكن متفوقين

والى انا واثقه منه ان اهلنا اكيد تعبوا فى تربيتنا

لكن زمان البركه كانت فى كل حاجه حتى فى التربيه

الى اهله بيتعبوا عشان يربوه بيطلع حاجه كويسه اكيد

انما دلوقتى اولادنا تحس سبحان الله انهم راضعين لبن العفريت

عصيين وعنديين وراسهم ناشفة , لا أكل عاجيهم ولا لبس يرضوا يلبسوه الا لما يتشرطوا

ويتنطوا

زمان كانت أمى تبصلى بطرف عنيتها بس من غير متتكلم أراجع نفسى ألف مرة وأشوف انا ايه
عملته غلط وخصوصا لو عندنا ضيوف

انما دلوقتي بنبص وبنبرق واحتمال نحول ولا هما هنا

نكح شوية ونعطس شوية يمكن ياخدوا بالهم مفيش فايده , ولو أخذو بالهم يطنشوا ويكبروا يعنى لما
الضيوف تمشى هتبقا علقه ولا أكثر

العيل من صغره تحس انه فاهم كله حاجه صعب الضحك عليه

يعنى معدش ينفع معاهم تعالى يا حرامى خود حمادة علشان مخلصش أكله

أو نام بسرعة قبل ما يجى أبو رجل مسلوخة ,

دا انتى لو جيتيله أبو رجل مسلوخة بذات نفسه إحتمال يتصاحب عليه ويجنده ضدك

أحلام اطفال زمان كانت بسيطة , ولعبنا كانت بسيطة ولو ملقناش لعبة كنا بنتخيل اننا معانا أحسن
لعب ونمثل ونضحك , كنا ممكن نتخيل العجلة القديمة عربية أحدث موديل , والكورة المقطعة نلعب
بخيلانا بيها ماتش كاس العالم ونعمل نفسنا مارادونا

كنا بنستمتع ونضحك ونتعلم واحنا بنلعب

حتى برامجنا اليومية فى التلفزيون كانت بسيطة وقليلة , كنا نستنى من الأسبوع للأسبوع ماما
عفاف الهلاوى فى سينما الأطفال

دلوقتي قنوات الأطفال بقوا أكثر من الأطفال نفسهم , برامج وكرتون وأغاني ٢٤ ساعة

ولو زهقوا من التلفزيون يحولوا على الكمبيوتر

أطفال دلوقتي بقوا بيتعاملوا مع أجهزة يقولوا عليها أجهزة ذكية بس للأسف بتأثر على ذكاهم
وتركيزهم واستمتاعهم بالحياه

دنيتهم بقت كدة وعلى أد ماهما متقدمين عننا زمان بس بجد مش محظوظين

احنا أخذنا الحظ كله واللعب كله والمتعة والحياه , هما مساكين عمرهم ما هيتخيلوا أد ايه طفولتنا
زمان كانت جميلة وممتعة برغم بساطتها

بس مهما حاولنا نشدهم لذكرايتنا بيشدوننا هما لعالمهم الكبير أوى عليهم وعلينا , وحقهم علينا اننا
نفضل واقفين جمهم ونوجههم , بس أوقات كتير بنكتشف ان فى الزمن ده مش إحنا اللى بنعلم
أولادنا وبنربيهم لأ دا حنا اللى بنتعلم معاهم وبنترى من أول وجديد

ولا الرقيه فاتن حمامه .. وفساتينها الى ارق منها وخصوصا الفستان الاسود الى كانت بترقص بيه مع
عمر الشريف في سيدة القطار

ايه الرقه والفخامه دى في نفس ذات المومنت (اللحظه)

الفاستين القصيره المنفوشه .. ورسمت العين الساحره .. والروج الاحمر الى كان يظهر شكل شفائهم
كأنها بجد تفاح

ايه ده بساطه وشياكه واناكه وفخامه في نفس اللحظه

والغريب انهم كلهم والى اكتشفته بمد كده كانوا بيصلو فساتينهم يا بنفسهم زى الفنانه الجميله
زييده ثرووت

يا بيتعمللو مع خياطه واحده زى الجميله سعاد حسنى هى الى كانت بتفصلها كل لبسها ياما مع
خياط لبناني واحد بردو زى صباح

يعنى لا كانوا بيلبسو من بيوت ازياء شهيره ولا حتى بيقلدو موديلات جايه من بلاد بره

كانت ابتكارهم ولبسهم وتصميماتهم الى كانت بجد فريده من نوعها ما تلاقيش زيها

والميكب بتاعهم كان عباره عن كحل وروج ومسكره فقط

وكانو بيقو قمرات منورين كده

وعلى راي عمنا عادل امام في فيلم عمارة يعقوب يان

ان الموضه كانت بتظهر هنا الاول قبل ما تظهر في باريس

الشياكه كانت بتبدأ من هنا مش بنشحتها ونسخها من بره

انا فاكره اني مره شوفت لقاء قديم لصباح في مجلة الكواكب كانت بتكلم عن شغل التتريز الى

كانت بتعملوه مع صديقه ليها على فساتينها بنفسها عشان تخللى الفستات مميز وما حدش يعرف
السر ده غيرها هي وصديقتها

يعنى حتى فساتينهم الرائعه دى كانت تكلفتها قليله بالنسبه للزمن ده ..وبنظر فى منها الشياكه
كمان

انما ناووو وموضة ناو ولبس ناو

تحس ان البنات بقو من كتر ما بيقلدو لبس بره بقى مالموش لا طعم ولا ذوق فى اللبس

لان طبعا اللبس الشيك والتصميمات الرائعه بقيت حكر على المصاميين الكبار

حتى الفنانات عشان تبقى مميزه مش زى اى حد لازم تدفع الشئ الفلانى لمصمم الازياء عشان
يعملها فستان

يتكلف شئ وشويات واحتمال يطلع فى الاخر شكله حلو عليها ولايق عليها

مش هقولكم بقى على موضة لبس البنات اليومين دول فين وفين لما تلاقى واحده لبسه فستان

كده وشيك فى نفسها الا كله ضارب البنطولون الاسكىنى وعليه البادى الاسكىنى بردو

فسورحات فطيع بتور فى الضلمه والى محجه والى مش محجه

حطى على قورتها سلك كده مش عارفه ليه

صحيح هو ايه لازمة السلك ده يعنى عشان ل الكهرباء قطعت ولا حاجه

ومعظم البنات ضربين الجيتر والتيشرت وفين وفين لما تلاقى واحده لابسه جيب ولا بلوزه كده
شيك

انا مش بنتقص اللبس انا عارفه انه لبس عمللى وانا شخصيا بلبس الجيزر والشيمزات الواسعه

انما انا الى بستغربه استيرادنا لكل حاجه من بره موضه من بره تقاليع من بره

سواء كانت تتماشى معنا ومع مجتمعنا ولا لا

سواء لايقه اصلا على البنات ولا لا

يعنى بيكون صعب اووى لما تلاقى بنت ملاينه اووى ولا بسه كل لبسها ضايق جدااا

انا بتصعب عليا لانها بجد بتبقى مش فاهمة طبيعة جسمها

ولا ايه الى ممكن يليق عليها وايه الى ممكن يخللى شكلها منتقض جدااا قدم الناس

مش هقول ما نمشيشي على الموضوعه لا يقولو عليا متاخره انا بس بقول نحاول نرجع لجزء من انوسة
زمان وجمال لبس زمان

وشياكة زمان ونقلل من تشرد لبسنا الحالى الى بقى مستنسخ من ناس مالهومش علاقه بينا ولا من
نفس عاداتنا

ده حتى الواحده مننا لما بتبلس فستان بتكون شرياه من مكان كويس ولايق عليها

بتحس انها لافت نفسها من تاني ورجعت للنوثتها من تاني

وخالى البس العملى والجيتز للوقت الشغل والبهدله وبلاش السلك الى على الراس ده والفسفورىكا
انا بس خايفه عليكم لا تتكهربو .

الغربة - هناء محمود

مفهوم الغربة بيختلف بين شخص وشخص , الغربة ممكن تكون مكان مختلف عن اللى اتولدنا
واتربينا فيه وممكن تكون أشخاص مختلفين عن اللى نعرفهم طول حياتنا وممكن تكون مجرد احساس
حتى لو كنا فى مكانا وفى وسط أهلنا ,

بس الغربية اللي هنتكلم عنها النهاردة هي غربة المكان , السفر البعيد علشان لقمة العيش

زمان كانت الغربية غربة بجد , كان اللي بيغيب بتغيب أخباره وحكاياته معاه .. كل فين وفين لحد ما بيعت جواب وممكن كمان الجواب ميوصلش , كانت الزوجة او الأهل بيستنوا بفارغ الصبر أى واحد نازل اجازة من البلد اللي فيها قريتهم المتغرب , علشان بيعتولوا جوابات أو يسجلوله شريط كاسيت يسمع فيه أصواتهم ويحكوله أخبارهم , أخبار زمان بطريقة زمان

نحب نحيط علمك ان عlish دخل الجيش وأختك سوسن جالها عريس من البلد اللي جمننا وعاوز يدخل فى خلال سنة واحنا يا بنى زى مانت عارف البير وغطاه , وامالنا فى ربنا ثم فيك تساعدنا فى جهاز اختك , وربنا يعينك يا حبيبى ويرجعك بالسلامة , مراتك عاوزة تقولك حاجة ...

وتتكلم مراته وبعدين ولاده ولو حد من الجيران معدى بالصدفة يندهوله ويقولوله احنا بنسجل شريط لوحيد تعالى سلم عليه

ولو حصل حاجة مستعجلة ولازم يعرفها بسرعة زى أبوه عيان او مراته ولدت ولد يشدوله تلغراف علشان الخبر يوصله فى اسرع وقت

ولما الحياة اتطورت شوية وانتشرت التليفونات كانوا يتفقوا مع الجيران اللي عندهم تليفون ان وحيد ابني هيتصل كل يوم خميس الساعة ٥ بعد العصر وقبل المعاد بنص ساعة تروح أم وحيد ومرات وحيد وولاد وحيد يقعدوا عند الجيران يستنوا الترانك واول ما يرن جرس التليفون تبدأ الأصوات العالية والحناءات على سماعة التليفون وكل واحد عاوز يقول الكلمتين او الطلبات اللي محضرها ويمكن وحيد مبيسمعش نص كلامهم من كتر الأصوات اللي بتتكلم دا غير ان المدة بتخلص فى نص الكلام

أما وحيد فهو بجد بيقا وحيد بمعنى الكلمة بيغيب سنة او اتنين ويمكن ثلاثة ورا بعض عايش يشتغل كثير وينام قليل علشان بيعت فلوس تقضى طلبات الكل بتفوته كل المناسبات الحلوة والوحشة

وبتوصله الأخبار متأخر وعمما يرجع وحيد بيلاقى الدنيا بقت غير الدنيا والبلد اتغيرت والصغير
كبر والكبير تجوز وخلف والعواجز ماتوا

كان زمان يرجعوا من سفرهم فجأة .. يبقا أهل البيت لا بيهم ولا عليهم ويلاقو عربية بيجو ٧
راكب بتقف قدام البيت ومحملة فوقها المروحة والتيليفزيون والفيديو والتسجيل أبو باين , وطالع
منها وحيد ابنهم المتغرب بقاله ٥ سنين محدش شافه ,, وتبدأ الزغاريت تعلق ويندهوا على بعض

بت يا سوسن وحيد اخوكى رجع

يا أم أحمد أبو أحمد رجع

يا عليش تعالى سلم على أخوك

يا فتحية يا عيشة يا واد يا أحمد أبو ووكو أهو

ويقعد وحيد على الكنبه وباب البيت يتفتح للرياح والجاى يدخل يسلم على وحيد ويص بطرف
عينه على المروحة والتيليفزيون والراديو والتسجيل ابو باين ويطلعوا بقا يقولوا لبعض دا وحيد ابن
ام وحيد رجع وبسم الله ما شاء الله جايب الخير كله معاه

وقمة الانهار بقا لما وحيد يفتح الشنطة المقفولة ويطلع البطانية الناعمة المرسوم عليها النمر بيحصل
للكل صدمة حضارية من العيار الثقيل

وتتلم العيلة كلها علشان تشهد يوم افتتاح التيليفزيون والفيديو ومرات وحيد تشغل المروحة ١٠
دقايق وتريحها عشر دقايق علشان تحافظ عليها دا لو محطيتهاش فى اوضة النوم وغطيتها بالملاية
وكتبت يافته ممنوع الاقتراب

ويطلع وحيد كل يوم العصر يقعد على القهوة واصحابه يتلموا حوالية علشان يحكى حكايات ألف
ليلة وليلة عن البلد اللي كان فيها وأد ايه هما متطورين عننا وأد ايه هما مرفهين ومبسوطين والدنيا

هناك غير الدنيا

بس دلوقتي دنيتنا احنا كمان بقت غير الدنيا بقينا عايشين فى وسط أهلنا زى المغتربين , من كتر ما شغلنا وحالنا واخذنا بقينا بنشوف بعض كل فين وفين , علشان كدة الغربة بقت أسهل لأننا متدربين عليها كويس , قلوبنا بقت أقوى ومشاعرنا أجد

دا غير التطور ساعدنا كتير ووفر علينا تعب كتير , دلوقتي المغترب يقدر يكلم أهله كل يوم لو مكنش بالتليفون يبقا عن طريق النت وصوت وصورة كمان

ويمكن كمان يحضر مناسبات العيلة وهو فى مكانه , ولو واحد مغترب عاوز يدور على عروسة من بلده بيدور عليها ويقابلها ويتفق فى الجوازه وهو فى مكانه ولو عنده مشاكل ومش عارف يتزل يحضر خطوبته ممكن يحضرها عن طريق النت ومامته هى اللى تلبس العروسة الدبلة ايه المشكلة ؟ هو هيتزل مخصوص علشان يلبس الدبلة ولا ايه !!؟

وبما ان كل ده حصل وهو محضرش يبقا مجاتش على الفرح , أهل العروسة يلبسوها الفستان ويعتهاله على أول طيارة

ولما تحمل وتقرب تولد بيعتها هو على تانى طيارة , وبعد ما تولد بيعتوله صورته البيبي فى نفس اليوم أو فيديو صوت وصورة

اى نعم الطفل يفضل فترة متخيل ان باباه محبوس جوا الكمبيوتر ومش عارف يطلع بس بعد كدة بيفهم انها مجرد وسيلة اتصال وان باباه ده لحم ودم زينا كدة

زمان كانت الغربة صعبة لأن الناس كانت مرتبطة ببعضها اوى كانت العلاقات قوية بين الأهل وبعضها وبين الجيران وبعضها لو حد غاب يوم واحد التانى بيسأل عليه علشان يطمئن , مكنش فى حاجة بتسلى الناس غير الناس علشان كدة لما كان حد بيسيب كل ده وبيتغرب كان بيعس باليتم والوحدة

أما دلوقتي بقا , الفرق بين المغترب واللى عايش فى بلده , ان الأولانى مغترب غصب عنه والثانى مغترب بمزاجه , مش فاضى لحد وعامل نفسه مش واخذ باله وملهى فى حاله , بس التانى مش بيعس بالنعمة اللى بين ايديه إلا لما يجرب الغربة اللى بجد , لأن مهمما كانت وسائل الاتصالات بقت دلوقتي بتقرب البعيد , فلمة الأهل وحصن الأم والحبيب عمر ما هيعوض عنها اى شئ او اى اختراع وابتكار ,,

ربنا يكفيننا شر الغربة ووجع الغربة وما يبعدهش حبيب عن حبيبه ابدا وميحرمناش من لمتنا مع بعض

جهاز العروسة ...

هناء محمود

جهاز العروسة هو أول شئ يفكر فيه أهل البنت من وهى لسه فى اللغة , ولو ربنا رزق أب وأم بنتين أو ثلاثة يفضلوا حاملين هم هنجهم ازاي ؟ وهنجيلهم منين ؟ , والبنات أصلا لسه بيلعبوا فى الشارع ويمكن تكون فيهم بنت لسه بتسنن

ودا لأن أى جهاز عروسة دلوقتى محتاج دراسة جدوى وتحديد ميزانية قبلها بسنين علشان المشروع ينجح ويتم تجهيزها بسلام , وتروح لصاحب نصيبتها

زمان كان اهم حاجة فى الجهاز هو صندوق كانوا بيسموه صحاره , كانت البنت تحوش فيه جهازها المكون من شوية قماش ومفرش تراييزة وملايتين سرير وجلبيتين بيت وجلبيتين خروج وملاية لف وبيشة

نىجى بقا لأصعب وأهم حاجة وهو تجهيز المطبخ اللى بيكون عبارة عن عملية فيها صنية شاي و٤ كوبايات و٤ معالق و٤ أطباق وحلتين ولو كانت بنت عز شوية أهلها بيشتروها طقم نحاس مفتخر تتعاقب بيه وسط أصحابها وأهل جوزها

وطبعا الهون الراعى الرسمى للأعياد والمناسبات المعلن عن دق الكفتة وان البيت ده دخلته اللحمية وكل سنة وانتو طبيين

وعلى حسب امكانيات العروسة بيتوقف ان كانت هتدخل بوابور واحد أو ياتنين أو ثلاثة , وطبعا السبرتاية من الحاجات الضرورية علشان قاعدة القهوة والمزاج العالى , والقلة والزيبر كانوا من اساسيات الحياه

ومنقدرش نسي شغل الاضاءة عدد اتين لامبة جاز بشريطين احتياطي ويا سلام بقا لو جابت الكلوب بيقا العريس أمه دعياله

ييجى بقا لتجهيزات الحمام وهى عبارة عن طشت نحاس مقاس كبير وكوز صغير لزوم الشاور وبستلة ألومونيوم علشان تسخن فيها الماية على الوابور فى الشتا والمقشة البلح لا غنى عنها فى اى بيت عصرى من بتوع زمان

أما بقا بالنسبة للعريس كان بيضغط على نفسه ويجيب الكنبتين البلدى او الاسطمبولى والسرير النحاس ولو كان مسرف شوية ومدلع مراته يجيب الطبلية والكليم أو الحصيرة حسب الميزانية وشوية ستات صحتهم حلوة ياخدوا جهاز العروسة على راسهم ويمشوا يزغرتوا وينقلوه على بيت العريس أو أوضة العريس اللى فى بيت أهله ,

وتانى يوم يتلموا فى بيت العروسة ويطلبوا ويرقصوا والماشطة تيجى تزوء العروسة وتعملها أحلى صفرتين وأوصة وشوية كحل وأحمر حدود والعروسة تبقا زى القمر , وتظبط الطرحة المروحة وتحط وردة شمال ووردة يمين , ويطلبوها شوية وبعدين ياخدوها على بيت العريس فى الهودج وهو عبارة عن خيمة صغيرة فوق جمل كانت العروسة بتتزف فيه , والعريس ماشى جنبها على حصانه ولا أبو زيد الهلالي فى زمانه وتخلص الليلة وألف ألف مبروك وعقبال البكارى

وكانو بيعيشوا حياتهم عادى وبيخلفوا اولاد وبنات زى الفل ما شاء الله والصحة والمزاج عال العال انما دلوقتى بيجهزوا للجواز كأنهم فى منافسة أو داخلين معركة مع العدو ومينفعش لولو بنت خالتي تجيب البوتجاز التاتش وانا لأ

وانا لازم أجيب ماكنة شعر البنات زى كوكى بنت عمى

وبعد ما كان جهاز العروسة عبارة عن شوية معالق وكوبايات وحلوتين ووابور , بقا بوتجاز وتلاجة

وغسالة وفرن وميكرويف و شواية وقلالية وخالاط وعصارة واخل الخ

دا غير النيش وما أدراك ما النيش , العروسة بتعامل معاه كأنه متحف الشمع , بتشتري للنيش كل ما هو غالى وثمان من أطقم كاسات وكوبايات وفناجين وأطباق أشكال وألوان وكل سنة يطلع نوع جديد ينضاف لقايمة مستلزمات النيش , من أول الصيني للبايركس للأكروبال وما لا يعد ولا يحصى والغريب ان أغلب اللي موجود فى النيش دا إذا مكنش كله , العروسة مش بتستخدمه غير للضرورة القسوى , هو عبارة عن متحف شمع زى ما قولتكم للتصوير فقط و ممنوع اللمس والكليم والحصيرة واللمبة الجاز بتوع زمان اتحولوا بقدره قادر لسجاد ونحف وستاير ومفارش وتحف وانتيكات

والمقشة البلح اتحولت لمكنسة كهربائية والكنبتين والطبلية والسريير اللي كان بيحجيههم العريس بقوا صالون وانتريه وأوضة سفرة ونوم وأوضة أطفال كمان هو ايه اللي حصل ويا ترى ايه اللي لسه هيجصل ؟

أنا آخر حاجة سمعتها ان اللاب توب بقا على العروسة طيب سنة كمان وهيبقا الآى باد على العريس ولا ايه ؟

ونخلص من الجهاز اللي عمره ما بيخلص وندخل على الفرحة والكوافير , تفضل العروسة رايحة جاية على الكوافير من قبل الفرحة بأسبوع , كل يوم ماسك شكل وحمامات كريم ولو اضطرت العروسة لعمليات تجميل قبل الفرحة ممكن تعملها عادى , أما رحلة البحث عن فستان الفرحة دى لواحدتها حكاية , وقاعة الفرحة طبعا لازم متكونش أقل من القاعة اللي كوكى بنت عمى عملت فيها فرحتها

علشان كدة بنلاحظ الفرق الكبير بين عروسة زمان يوم فرحتها وعروسة دلوقتى

عروسة زمان كانت بتقعد يوم فرحتها هادية وعاقلة لا بتتحرك ولا حتى بترمش ثابتة كدة كأنها بتلعب يوجا , أما العروسة دلوقتى هى تقريبا اللي بتحجى فرحتها لأنها مش بتكون مصدقة انها انجزت

المهمة وخلصت كل حاجة ومنسيتش حاجة فى جهازها تكون جابتها لولو بنت خالتها وهى لأ , من فرحتها مبتقدرش تسيطر على نفسها وكمات علشان تحلل فلوس القاعة والبوفيه بتأخذ الفرحة من أوله لأخره رقص واصلة واحدة بدون بريك , بيبقا هاتين على ماماتما تعملها ساندوتش من البوفيه تمسكه فى ايديها وهى بترقص علشان تقدر تواصل الليلة

ويخلص الفرحة وتروح العروسة مع عريسها فى العربية الليموزين وتدخل شقتها المتجهزة من مجامعية وألف ألف مبروك وعقبال البكارى

وبعد كدة العروسة تخرج من كل ده بتريقة المعازيم على فستاها اللي كان شكله بيئة وتسريحة شعرها اللي مكنتش لايقة عليها ومكياجها الأوفر , والبوفيه اللي مكنش أد كدة , وتبدأ تعليقات أهل العريس على جهازها اللي شكله مش غالى و ذوقه بلدى وإزاي تنسى تجيب ماكينة الكايبيتشينو فى عروسة بتتجوز دلوقتى من غير ماكينة الكايبيتشينو يا ادى الفضيحة أم جلاجل والجرسة أم حناجل

ساعات بسأل نفسى هما إزاي كانوا زمان عايشين بإمكانياتهم القليلة دى !!؟ واحنا دلوقتى عندنا كل حاجة ومش عاجبنا ولسه عاوزين كمان !!؟

بس سؤالى ملوش غير اجابة واحدة , زمان مكنش عندهم كل اللي عندنا دلوقتى بس كان عندهم حاجة مهمة أوى هى اللي نقصانا .. الرضا والقناعة إالى من غيرهم لو معانا كنوز الدنيا هتبقا فى نظرنا ولا حاجة

ربنا يرزقنا الرضا بالنصيب والقناعة بالمقسوم لينا , ساعتها بس هنعرف يعنى ايه راحة بال وهندوق طعم السعادة

التكنولوجيا ...

رؤى كمال

ازيكم عاملين ايه فى الحر والصيام طب والله احنا فى نعمه اه درجة الحرارة عاليه

بس على الاقل دولتى لقيين تكييف الواحد ممكن يقعد فيه او على الاقل مروحه

شغاله فوق راسه ترطب عليه

زمان كان رمضان ومش عاوز اقولكم بقى رمضان زمان فى الصيف كان بيكون عامل ازاي

كنت وقتها صغيره ولسه بقول ياهادى فى موضوع الصيام ولما ماما اصرت ان اصوم اليوم كامل

كان بالنسبه ليا فرح عشان هسبتلهم انى كبيره وهقدر اصوم زيهم

كان زمان فى اذانين اذان قبل الفجر بربع ساعه ده اذان الامسك.... وبعده اذان الفجر

الاذان الى بنصلى بعده

وانا طبعا اول مره التزم بالصيام وكنا زمان بنام من بعد التراويح مش زى دلوقتى كله سهران

والمسحراتى يعدى يصحينا نتسحر

نتسحر ونصلى الفجر ونرجع ننام

وللانا كنا الصيف فكنا كلنا بنام تحت المروحه الكبيره الحديد الى فى الصاله

نفرش كلنا وننام تحتها كل البيت ينام فى وقت واحد ما هى مش سيهلالا زى دلوقتى

ونصحى الصبح كيبرنا اووى الساعه ٨ وناخذ اليوم بقى صيام من اوله حاجه كده صيام على حق

مش دلوقت .

بينامو لحد ما المغرب ياذن

وتفضل والدتي واقفه في المطبخ بتحضر الفطار لحد العصر

وبعد العصر كل البيت لازم ينام ساعتين تحت المروحة الكبيره الى في الصاله

ما هي دي الحته الطراوه الى في البيت

ونقوم قبل الاذان بنص ساعه نسمع الشيخ متوالى الشعراوى رحمة الله عليه قبل الاذان

وانا واخواتى البنات بنساعد ماما في حط الامل على الطليه

وطبعا لانكم ما تعر فوش ايه هي الطليه هي زى الطريزه بس برجلين قصيره

كنا بنقعد ناكل عليها واحنا قاعدين ومرحرين كده على الارض

مش تدميتت الطرايبزات زى دلوقتي

تصدقو ان بساطت زمان في كل حاجه الواحد بيفتقدها دلوقتي... زمان لما كنا نحب نشرب مايه

ساقعه بجد

على الرغم اننا كان عندنا تلاجه المصانع الحريه وقتها عارفينها ولا ما توعوش عليها...

انما بجد احلى شوية مايه ساقعين كنا بنشربهم من القله

وطبع لازم اترجموكو كلمة قله ولا فهمنها

على الاقل كانت ستر وغطا علينا وما بتفقس اننا فاطرين لما بنشرب منها

مش باب التلاجه الى كان بيزيق وييفضحنا وقت العصريه

وتلاقى ماما عامله زى عسكرى الدرك وتلا فى الصوت جملجلى فى البيت ماهو الكل نايم (مين الى بيفتح باب التلاجه ؟))

كانت بتكون فضيحه بجلجل

ونقعد نتفرج على التلفزيون الكبير على فكره احنا كنا

من الناس المرفهه الى عندهم التلفزيون الى جوه صندوق خشب كبير

عشان الصوت يكون واضح

وكان لما الارسال يبوظ شويه بابا يطلع يثبت لينا الارياى حاجه كده معدن ليها دراعات كثير

هى دى الى بتظبك الارسال عشان نعرف نتفرج على مسلسل الساعه ٧

وممكن بعده نسمع شويه الراديو او نزل نلعب ساعه بالفوانيس تحت البيت

ما هو الدنيا كانت امان والعب مع اولاد الجيران كان هو اللعب المتاح لينا

وماما ياعينى لما كانت تحب تتصل تعيد على اخواتها وقريبها اول رمضان

تلاقيها تفضل تتصل من التليفون ابو قرص ده عرفينه الى بتشوفوه فى المسلسلات القديمه

وتفضل تتصل بالسنترال عشان تبعت تلغرفات لكل معارفنا

او لازم بابا يعينى يطخ المشوار للسنترال يطلب كام مكلمة مباشر عشان يعيد على قاريننا فى البلد

ما هى الدنيا كانت غير الدنيا

مش دلوقتى تكتب مسدج (رمضان كريم) مثلا وتدوس على زار تلاقيها اتبعت لكل الناس الى

تعرفهم

شوفتو تكنولوجياية زمان كان ليها شكل تانى مش هنكر ان احنا دلوقتى فى عصر التكنولوجيا وكل حاجه بقت بالتش

انما زمان كان روقان وكنا بجد بنحس بلذة كل حاجه

دلوقتى احنا للحق مرفهين نايمين فى التكييف الاسبلت بخاصية البلازما الى بيتنقى الهواء من الاتربه والرواح

ودايماعاينين سبحان الله

وندخل المطبخ قبل الاذان بشويه نسخن الاكل فى الميكرويف

ونقعد قدام الشاشة الـ led

نقلب فى الريسيفر بالريموت كنترول بين الف قناه وقناه وممكن ما نشوفش اى حاجه من كتر ما بنقلب

تحس ان صوابنا بقى فيها خاصية التقلاب الذاتى ما بتحبش تستقر على قناه

ما تعرفش ليه تحسها بقا فيها فيبرشن دادادادادا لو وقفت على قناه لثوانى

ونشوف لقطة من المسلسل ده على اعلان على القناه دى على مقلب على القناه الى بعدها

وهكذا بدون اى استقرار

ونزهق بعد ده كله ونمسك التاب او الايفون ٥ ندخل على الفيس او تويتر او نشوف اى حاجه على اليوتيوب

او نعمل شات على الواتس اب

وفى الاخر تلاقى الكل بيشتكى من حالة الملل الرهيبه الى هو عايش فيها

مع كل التكنولوجيا الى بقينى اصلا مش عارفين نواكب فيها كل جديد

والبركه طبعا فى اولادنا الى ماشاء الله بيروشونا من كتر ما هما بيعرفو يواكبو التكنولوجيا بسرعه

واحنا يدوبك بنحبي وراهم

وتلاقينا وخصوصا" احنا يا ستات كل ما تترنق فى حاجه فى الموبايل ولا التاب ولا اللاب نجري

جرى للاولادنا

عشان يظبطوها لنا

حتى فى رمضان على قد ما احنا مفتقدين فى حاجات كتيره زى ومان على قد ما احنامش ملاحقين

اننا نواكب فيه الى موجود دلوقتى رمضان اون لايين صحيح

مش رمضان ونومتنا تحت المروحه ساعة العصريه زمان

ايام الروقان

الرجالة ...

رؤى كمال

رجاله وطول عمرنا يا بلادنا رجاله

رجاله والموضوع ده بقا محتاج للاقواله

يعنى الراجل من دول زمان تلاقية هيبه كداا

طول ببعرض بحلاوه ولا عليه رصة زراير يخبلو فى البدله

والطاربوش منشى كده هيبه بردو وظابط زر الطربوش على اليمين

وعلى قد ما هو طول بعرض بوقار كده

او ما يشوف ابواه وامه ينتظر يبوس اديهم

ويقعد تحت رجليهم مش حتى جبههم على الكنبه

والصوت ده تون واحد النبره لا تتعدى الهمس

احترام يا يا ناس لا بصبصه للرايحه والى جايله

ويوم ما يتجوز يخللى نينه هى الى تختارله والغريب ان الاختيار كان دائما بيكون موفق

ويقولها أنا ممنون يا نينه

وتلاقيهم يتجوزو وسعدا جدااا بعد الجواز

ما علينا الامهات زمان كانوا مكشوف عنهم الحجاب تقريبا

اما بالنسبه للرجاله تلاقى الراجل منهم محترم من البيت للشغل والشغل للسوق يشيل

على قلبه البطيخه الى قد اهمم وكيس الخضار الناحية الثانيه

ويملا جيبه ارواح وملبس وحب العزيز ويديهم قرشين ساغ علشان يروحو يشتروا ضانضورما

اه مش هنكر انهم كان بيجلهم هفه احيانا بعد سن الاربعين ويلفوا على الغوازي والراقصين

زى سى السيد فى بين القصريين

بس كانوا وقت الشد مثال للجدعنة والمروءة

ولاد البلد يعنى الشارع كله بيوقف فى ضهر التانى

يعنى مافيش معكسات لبنات الجيران

يعنى الخوف على بنت حنته كأنها اخته ولا امه

يعنى على قد ما كانوا مسيطرين على قد ما كانوا حنينين على بيوتهم واهليهم واخواتهم

انما ناوووووو وما ادراك ما ناو

أكيد لسه فى رجالة لكن ظهر نوع جديد أشباه للرجال

هما مكتوبين فى شهادة الميلاد ذكر... والاعرب فى البطاقه بردو ذكر

لكن فى الفعل الأنثى أجدع منه , مش بقول كل الرجاله بس فى كتير للاسف

بقوا اشباه رجال خالو الواحد يشك فى نفسه

والغريب انهم لو سالتهم ايه انت مش راجل يرد يقوليك الرجاله ماتت فى ٧٣

يعنى اخر الرجاله راحو فى الحرب

بقينا نستغرب لما نشوف بنات مسترجلة , بس هنستغرب ليه ماهى لو معملتش كدة مش هتلاقى
راجل يدفع عنها

مثلا لو واحده ماشيه فى الشارع وواحد عاكسها ولا اتحرش بيها
موقف ممكن يتحل فى لحظة بشهامة راجل بس للأسف غالبا مبيحصلش

البت يعنى من صدمتها ان ما حدش دافع عنها

بتتخافق وبتدافع عن نفسها وممكن تشتم وتضرب كمان

ولو صرخت ولمة عليه الناس تلاقى الرجاله الى موجودين

يردو عليها ويقولوها عيب الى بيحصل ده انتى بنت عيب تمسكى فى الراجل كده

ما تصدموش عادى بتحصل وفين وفين لما تلاقى

واحد كده لسه حاطط نشان الرجوله صح الى يتدخل وياخذ للبنت حقها

الغريب ان الاشباه دول مش فى الشارع بس دول بيتغوللو وينتشرو ويستطوطنو فى

كثير من البيوت

زمان كان الراجل عيب أووى ياخذ فلوس من مراته أو أهل مراته , بتبقا عار على رجولته

وكان ييكى بدل الدموع دم لو حصلت ظروف واضطر يبيع غويشة ولا خاتم من ذهب مراته ,
وأول ما تتحسن ظروفه

يجبيلها بدل الغويشة ٢ واخلخال وكردان فوقهم هدية

انما دلوقتى بقينا نسمع ونشوف العجائب راجل تلافيه متجوز وفاتح بيت ومستنى مراته ترجع من

الشغل عشان تديله المصروف وفي البطاقه راجل

تلاقيه بيشتغل وليه مركزه ولما مراته تطلب منه طلبات البيت يقولها وانتي شغلتك ايه وفي البطاقه راجل

يشوف البيت في الشارع بيتحرش بيها ويمكن بتغتصب ويقف يتفرج ويصور كمان وفي البطاقه راجل

ما بيحترمش حد وممكن توصل بيه انه يهين ابوه وامه الى طلع عينهم عشان يربوه ويتكتب في البطاقه راجل

مش هقول اهم كثير بس للاسف السلبيه بقيت بتطغى على كثير منهم

وكلمة وانا مالى بقت لبانه في بقهم

يمكن الكيماويات اللي في أكلنا أثرت على جينات الذكورة والتطور البشرى

يمكن التلوث البيئى أثر على العقول والنفوس وقلبنا الموازين

لأ هو خرم الأوزون والاشعاعات اللي بتوصلنا السبب في ظهور الكائنات دى على الأرض

بس عاوزين ضرورى نعمل محمية طبيعية ونجمع فيها الرجالة اللي بجد اللي لسه عايشين في وسطنا علشان نحافظ عليهم والنوع النادر ده مينقرضش

ايوه لسه موجود رجالة , موجود لسه الأب القدوة والأخ الحنين , والجار الشهم

لو بصينا حولينا ودققنا كويس هنشوفهم بيحاولوا يغيروا كثير حواليتهم

هما اى نعم نادرين بس المهم اهم موجودين

وهو ده اللي لسه محلى عندنا أمل إن ترجع أيام الرجولة اللي بحق وحقيقى

الرجولة إلى يعتمد عليها في وقت الشدة

الرجولة التي بنقف جهم بعضنا و بنرحم بعضنا بيها

مش الرجولة الى بنترحم عليها

الأكل ...

هناء محمود

لما أقول أكل زمان يعنى ريحة أكل جدتى اللى بيتشم من على أول الشارع ويجرى ريق الرياح
والجأى

جدتى اللى عمرها ما اقتنعت أبدا انى شبعانة ودايما مقتنعة ان أمى مقصرة فى حقى ومش بتغذيني
يا سلام لما كنت أروح أزورها فى الشتا وأشم ريحة شوربة العدس وهى مفحفة كنت بتدفى بس على
الريحة

وأجرى ورا الفراخ والبط اللى بتربيههم فى الحوش ماهو مكنش لسه فى فراخ بيضة وحمرا وخضرا
زى دلوقتى كان كله تربية بيتى

علشان كده اللى داق أكل زمان عمره ما ينساه , الشوربة كانت تدخل على الدماغ عدل تفتح
مسام المخ , كان أكلهم دوا طبق شوربة عليه نص لمونة كان يخلى أجدعها عيان يقوم يجرى زى
الحصان

حتى الخضار كانوا بيزرعوه وياكلوه طازة ولا كان فيه سمنة نباتى ولا زيت عربيات من اللى احنا
بناكله دلوقتى كله بالسمنة البلدى

كان صوت تحمير البيضة فى السمنة البلدى مختلف متقولش سيمفونية ولا طشة الملوخية مع شهقة
جدتى ولا أوبرا عايدة فى زمانها

ولا قاعدة خبيز العيش قدام الفرن الطوب دى لواحدتها حكاية , وصوت التبيط على المطارح

بتاعة زمان ولمة الجيران وهما بيخبزوا ويحكو ويضحكوا وريجة العيش وهو طالع من الفرن يدوخ الجعان , ورغيفي الصغير اللي كانت جدتي بتعملهولي مخصوص وأول ما يطلع من الفرن تحطلي عليه شوية سمنة وسكر لسه حاسة بسخونته على ايدي الصغيرة لحد دلوقتي وأنا قاعدة أكله على عتبة البيت

الفطار كان كله من خير البيوت , كان لبن وبيض وجبنة وعيش مخبوز وطماطم وخيار من المزرع في الحوش

حتى كوباية الشاي كان ليها طعم تاني كانت بتعدل المزاج بجد وانت بتشربها الصبح بدرى في البلكونة وبتصبح على الجيران واللى رايح واللى جاى

ووقت الغدا ده كان وقت مقدس الكل متجمعين وكل واحد في مكانه وبياكلو بالراحة كدة وبيسطعموا الأكل فيزيد طعامه فوق طعامته كانوا ناس أكيلة بحق وحقيقى

كان الأكل وقتها بجد مطرح ما بيسرى بيمرى , علشان كدة كانت ناس زمان صحتهم حلوة الست تتجوز وتحمل وتولد وميانش عليها ماهى متغذية ومتأسسة مش زينا متغذين على الفراخ اللي بتحدد النسل وبتأخذ حبوب منع حمل وعلى الخضار بالكيماموى و السمنة النباتى , تلاقى الواحدة فينا لسه في عز شبها ولو مشيت خطوتين تشحر ولو طلعت سلمتين بتنهج , ولو اتجوزت وخلفت بقا تلاقيها آخر اليوم راكنة على جنب زى العربية اللي عاملة حادثة ومستنية الونش يشيلها ما هو الفطار بقا كورن فليكس أو كوباية شاي على الريق وياريت ليها طعم هى مجرد لون وبس , الأكل النص جاهز بقا مالى تلاجتنا علشان معدش عندنا وقت ودايما مستعجلين , الفاكهة اللي كانت بتطلع في الصيف بس بقت بتطلع طول السنة وفاكهة الشتا بقت موجودة في الصيف , وكله متخزن ومتلج وملوش قيمة ولا طعم ,

كلمة طازة دى اتلغت من قواميسنا وحل محلها فروزن , الملوخية بقت فروزن الفراخ بقت فروزن

اللحمة فروزن , مفضلش غير ان البنى آدمين هما كمان يبقوا فروزن

بقينا بنفطر واحنا واقفين وبتتغدى فى المطاعم وجبات سريعة وممكن ننام من غير عشا , ولو اتغدينا فى بيوتنا نتغدى ايشى مكرونة بالبشاميل ايشى بيكاتا بالشامبليو والبيسى والكوكاكولا بقا هما الماية بتاعتنا , ومستغربين ان صحتنا بقت على قدنا

زمان لو حد حس انه تعبان شوية و راح للدكتور كان يقوله انت بتدلح يا حج انت زى البومب , ولو واحدة حالتها صعبة أوى يقولها الباش حكيم انتى محتاجة تغيرى جو يومين فى العزبة وهتبقى زى الفل

دلوقتى بقينا بنخاف نعمل تحاليل علشان منقلبش على نفسنا خلينا ساكتين , ولو اضطرينا نروح لدكتور نرجع بشوال أدوية دا لو محجزناش فى المستشفى يومين

بس احنا مش محتاجين مستشفى ولا أدوية إحنا محتاجين محاليل من شوربة جدتى بتاعة زمان تحبى فينا اللى موته أكل دلوقتى , محتاجين شمة بس لرغيف عيش طالع من الفرن ومعاها جبنة قريش وخصار طازة بخيره

إلى اكل أكل زمان واللى شرب شرب زمان , واحنا دلوقتى بتتغدى على الذكريات وعلى اللى كان آه يا غلابة يا احنا

التعليم ...

هناء محمود

زرع .. حصد .. درس .. لما بسمع الكلمات دى بتتقال بالطريقة دى لازم أفكر نجيب الريحاني في فيلم غزل البنات

لأنه كان في الفيلم ده بيجسد بجد شخصية مدرس زمان الفقير المطحون اللي كان عنده هدف ورسالة إنسانية

زمان التعليم كان على أد الحال والمدرس على أد الحال و الطالب كمان يادوب معاه شنطة قماش فيها كراسة وقلم وكتاب , وسبورة صغيرة كانوا بيسموها اللوح ومعها صوباع تبشير بس كانوا بالنسبالة اختراع

وبالرغم من قلة إمكانيات التعليم بالمقارنة بدلوقتي وحتى معلمين زمان مكانوش مؤهلين تربويا زى معلمين دلوقتي لكن كانوا مقدرين قيمة التعليم وكان للمدرس وقاره وهيبته لدرجة ان لو الطفل بيلعب في الشارع وشاف بس المدرس بتاعه بيعدى من على أول الشارع , قلبه بيدق جامد وبيجري يستخبي علشان ميشفهوش أو يوقف لعب ويحط وشه في الأرض لحد ما مدرسه يعدى الشارع , دا مكانش خوف على أد مكان هيبه واحترام

, وطلع من الزمن ده علماء ونوابغ رفعوا راس مصر وبدأو هما اللي يضيفوا للتعليم ويطوروا فيه , يمكن كمان أغلبيهم بدأو تعليمهم في الكتاتيب ,

ومين مسمعش عن الكتاب وحكاياته , كان يقعد الشيخ ويلم تلاميذه حواليه ويقرا آيه من القرآن والكل يعيد وراه وبمتهى السهولة يقدر يعرف الشيخ مين فيهم اللي نطق غلط مهما كان عدد التلاميذ اللي قدامه , واللى يتأكد الشيخ انه خلاص نطق الآية صح يخليه يكتبها على اللوح بخط

ايداه ويقراها تانى علشان تثبت فى دماغه , ويااويله اللى يغلط كان بالفلكة علطول ويتمد على
رجليه

كان التلميذ بيدفع لشيخ الكتاب قرش فى الأسبوع أو ٥ قروش فى الشهر ولو كان الكتاب مشهور
أوى وسيطه مسمع كان الشيخ ياخذ عشر قروش فى الشهر

كان فى أطفال كتير وقتها محرومين من التعليم ويبصوا على الأطفال اللى زيهم وهما خارجين من
الكتاب ويتحسروا على نفسهم , وساعات كانوا يحاولوا يقفوا برا الكتاب يتصنتوا على كلام
الشيخ ويرددوا وراه ويحفظوا من غير ما حد يطلب منهم أو يفرض عليهم ده

التعليم كان له مكانة كبيرة والمتعلم وقتها كان انسان مميز ومختلف وله قيمة مجد وكل الناس بتحترمه
وواحدة واحدة دخل النظام التعليمى الحديث لمصر وبقا فى مدارس ابتدائية وكمات اهتموا بالتعليم
العالى وبقا فيه مدارس الطب ومدرسة المهندس خانة ومدرسة الألسن , ماهو وقتها مكنش اسمها
كليات كان كله اسمه مدرسة

وسنين بعد سنين بقا عندنا الجامعات والكليات والتعليم بقا لكل صبيان وبنات

اللى احنا شايفينه فى الظاهر ان التعليم بيتطور والمفروض لما التعليم يتطور احنا كمان نتطور هو ده
رد الفعل الطبيعى

بس الغريب ان مع كل تطور حاجة تانية بتدمر , حاجة تخصنا كابنى آدميين , حاجات حلوة جوانا
بتختفى ويحل محلها أجهزة واختراعات

زمان كان الطالب بيعد مسائل الحساب على صواب ايديه ولو المسألة كانت عويصة شوية بيدخل
صواب رجليه فى حلها

شوية واستخدموا نوا البلح أو المشمش علشان المسائل الحسابية بس كانوا بيشغلوا دماغهم بردوا ,
بعد كدة الأمر تطور وبقا فيه عداد بسبورة , كلنا عارفينه , وآخيرا ظهرت الكالكوليتير اللى بسببها

المدرسة بالنسبالة بقت المكان اللى بيتجمع فيه هو وأصحابه علشان يستعرضوا فيه امكانيات موبايلاهم والأى بادات بتاعتهم , لأن للأسف بقا للمدرسة بديل اسمه الدروس الخصوصية الدروس الخصوصية اللى ضيعت هيبة المدرسة واحتياج الطالب ليها , وكمان ضيعت هيبة المعلم بتاع زمان

المدرسين دلوقتى بقوا بيعملوا اعلانات عن نفسهم

المدرس الفلانى ملك الفيزا والمدرس العلانى اسطورة الكيميا والساعة ب ١٠٠ جنيه وخصوصى فى البيت ب ٢٠٠ جنيه

وماشيين معاهم الستوب ووتش مش مهم الطالب فهم ولا لأ , المهم ان الساعة خلصت , لو لسه مفهمتش بيقا تدفع كمان علشان تفهم , بعد ما كان العلم نور بقا خد وهات ,

وزى ما بقا المدرس بيمن على الطالب بتاعه بحقه فى التعليم , بقا الطالب بيتناول على المدرس بتاعه كأنه ماسك عليه ذلة ,

وبالرغم من الجهود اللى بيعملوه الأهل مع اولادهم والفلوس اللى بتندفع فى الدروس الخصوصية علشان يشوفوا ابنهم احسن واحد فى الدنيا بنلاقى طلاب كتير بدل ما يوظفوا ذكائهم فى الدراسة والتعليم بقا معاهم دكتوراه فى أساليب الغش و البرشمة فى الامتحانات بمنتهى الذكاء , حتى الذكاء بقا بيتوظف غلط

هو ليه مع كل تطور بقت أخلاقنا بتدهور , متيجو نمسك العصاية من النص , ليه منستفدش بتطور دلوقتى ونحافظ على أخلاق زمان , ليه مناخودش الحلو من كل حاجة , ليه نفضل نتحسر على أيام الزمن الجميل واحنا بإيدينا نقدر نخلي أيامنا أجمل

النساء لما يبقو يعموله ان شاء الله

واقعد جهم بابا وهو بيتفرج على الماتش ايامها كان الخطيب بيلعب في الاهلى هو ومصطفى عبدو,
وثابت البطل, وشريف عبد المنعم, ومجدى عبد الغنى, وطاهر الشيخ, وحمدي جمعه... ومكسرين
الدنيا

وفي المقابل المعلم حسن شحاته, وصبرى المياوى, وفاروق جعفر, وعلى خليل, وطه بصرى,
ونصر الدين, ابراهيم ومحمود سعد بيلعبو في الزمالك.. ومولعينها

وانا وولاد الجيران على السلم بيحوشنا من بعض واحنا بنتخانق مين هيرقص التانى في ماتش الاهللى
والزمالك

الغريب ان معظم الناس كان بيتهم فيها تلفزيونات ايامها كان انتشر وكان قليل اووى الى لسه ما
جابش تلفزيون فى بيته

على الرغم من كده كله بيتزل يتفرج على الماتش فى القهوه مزاج يعنى وانا كنت بموت عشان
نفسى اتفرج على القهوه معاهم

الغريب ان الرووح الرياضيه وقتها كانت عاليه جدا انا احنا شعب بنعشق الكوره

انما عمرك ما تلاقى حد بيضرب حد عشان غليليه فى الماتش .. كبيرهم يهيصو على بعض شويه بعد
الماتش

وخصوصا لو الزمالك كان فايز كان بابا بيتعصب اووى ويطلع البيت جرى كانه مكسوف يورى
وشه لحد

بجد كانت احللى كوره واحللى روقان ..

انتو عارفين ان الناس من كتر ما كانت بتحضر الماتشات كانت احيانا بتفرش جرايد ووتقعد على

حتى دلوقتي تلاقى المشجعين نفسهم السنه دى الموضه يشجعوا الاهللى

والسنه الى بعدها يشجعوا وادى دجله لو دى الموضه

والغريب انك تلاقىهم منفعلين او ووى فى التشجيع ويقولو اللفاظ رهيبه حتى لو بيتفرجو

على كاس العالم ومالهومش فى الى بيلعبو من اساسه

انما تلاقىه محموق جدااا ويقول اللفاظ غريبه لجرد ان كوره الشت من لعب

وتلاقى صعب دلوقتي انك تاخذ مجموعه اصحاب وتروحي تنفرجو على ماتش فى مكان وخصوصا

لو كان معاكم اولاد خوفا عليهم من الى ممكن يسمعوه

مش هنكر اننا دلوقتي بقينا يمكن مرتبطين بالكوره اكثر من زمان

ومش هنسى شكللى انا وعيلتى واحنا بنتفرج على نهائى كاس افريقيا وفرحتنا جدااا لما جدوو
جاب الاجوان

الى كل ما كان بيتزل كان بيحبها

وحيتو عليها فى التلفزيون لدرجة ان فى نصاب اوقتها انتحل شخصية جدوو وحاول ينصب عليا

شخصيا من عشقى للكورة ووتحمسى للعبيه الجامدين بتوعنا

ومش هنسى دموعى وانهارى لما خرجنا من تصفيات كاس العالم ..ده يوم كانت مصر كلها بتبكي
فيه

ولا الاحداث الى حصلت بعدها لفانين اصدقائى فى السودان

بس الاكيد ان تشجيع الناس وحسها بقى اكثر بكتير من زمان

لكن اخلاقهم الرياضيه وروحهم الكرويه راحت منها اخلاق مشجعين زمان ورقى تعبيرتاهم زى

زمان

فین حسن شحاته یا مدراسه فن ولعب وهندسه

بیو بیو بیو بیو واللہ یا خطیر

نفسی نرجع نشجع زی زمان ونفرح وحتى ونهیمص علی الی یتغلب زی زمان

الأسعار ...

رؤى كمال

اقولكم ايه عن زمان وايام زمان

ده الواحد لما يقعد مع حد من اهل زمان

ويقعد يحكيك عن البركه والخير الى كان موجود زمان

الواحده تحس انها نفسها تتركب الة الزمن وترجع بيها لوراى حوالى ٦٠ او ٧٠ سنه

ايام ما كان الدنيا فيها بركه والواحد يقبض المرتب يكفى ويفيض

الناس زمان كانت عايشه فى ياغمه بجد

طيب هقولكم على حسبه بسيطه

زمان كن مرتب الموظف بيكون من حوالى ١٠ جنيه الى ١٢ جنيه فى بداية شغله

على فكره الارقام دى حقيقه يعنى مش بنقول اى كلام

يدفع منها اجار البيت ب ٨٠ قرش

وياكل ويشرب هو وزوجته والولاده التلاته ب ٥ جنيه طول الشهر

ويدخل جمعيات ب ٢ جنيه عشان يشتري حته ارض او ياخذ بيت ملك

ويوم ما يجب يخرج يفسح زوجته والاولاد الفسحه الى هى يتزل يركب الترام ب قرشين ونص

ماهى التذكره ب نص فرانك نص القرش يعنى

ويروحو يحضرو حفلة ام كلثوم الى الكرسي المميز فيها ب ٣٥ قرش

ويتعشى عشاء فاخر قى كبايجى الفى بيك ياكل الفرخه المحمره ب ١٢ قرش

ويجيبه كمان رطلين كباب وكفته ب ١٦ قرش

ويحبس بزجاجة من البيبسى كولا الى كانت ساعتها تمنها غالى جدا ب ٥ قروش

ويرجع هو وعيلته مبسوطين جدا

ما هو اولاده بيتعلمو فى مدارس مجانيه تماما ومافيش حاجه اسمها دروس خصوصيه

ويعمل جمعيه كام شهر فيقدر يطلع يحج ماهو الحج كان ب ٥٧ جنيه الى كانت اسعاره ساعتها

غاليه برضو جداااا

ويمكن كمان يشتري لمراته حثيتين صيغه تصيغ الى جرام ال ٢١ كان ساعتها ب ٩٠ قرش

ولا السكن ده كان ممكن يعمل جمعيه تانيه ويقرص على نفسه شويه

ويبنيله بيت فى مكان متطرف شويا زى المعادى كده ولا حلوان

ولا ممكن يجى على نفسه ويسكن فى مصر الجديده واهى بردو الترام كان بيوصلها فى الوقت ده

والشقق الايجار كان اقصى ايجار للشقق فى الاماكن الفاخره جاردن سيقى كانت ب ٨ جنيه ايجار

الفيلا

ولا شقه فى مكان زى الدقى ده كان من الاحياء الفقيره زمان كانت ب ٤٠ قرش ايجار الشقه

والعريس ممكن يحوش شهرين يعمل شقه كويسه ويفرشها ويحوش شهر بعد كده يجيب الشبكهخ

ويعمل فرح ويجيب رقاصه كمان

يقو كانوا عايشين في ياغمه ولا لا كانت البركه في كل حاجه والمربات بتكفي الناس تاكل وتشرب
وتفسح

انما ناوووووووووو

الفلوس بتدخل من الجيب وبتبخر جواه

الموظف لو قبض في الشهر ٢٠٠٠ جنيه يدوبك يكفوه موصلات وياكل ولاده عيش حاف بالعافيه

ولازم يشتغل بدل الوظيفه ٢ عشان يقدر يحصل مرتب ياكل ويعلم بيه اولاده

يعنى لو فكر مجرد تفكير انه يخرج اولاده من البيت

لازم يقتنع انه هيقضى بقيت الشهر مقضيها عيش وجبنه

ده ازاي فضل معاه تمن الجبنه

عشان بس تجراء وفكر يخرجهم

تعالو نحسبها

هتلاقى هي نفس العيله عشان يخرجو يدفعو موصلات حوالي ٥٠ جنيه

ويروحو سينما يدفعو ١٥٠ جنيه تمن التذکر بس

ولو فكر ياخذهم ويعشيهم بره البيت يدفعوهم حوالي ٤٠٠ جنيه كمان

ويشربو حاجه ساقعه بي ٣ جنيه الكانز يعني ١٥ جنيه

يبقى طبعا الواحد هيفكر مليون مره قبل ما يخرج مراته واولاده

الستات ...

هناء محمود

هو انتوا تيجو ايه فى ستات زمان واللى كانوا بيعملوه ستات زمان؟؟ الجملة المشهورة إالى مفيش ست من ستات دلوقتى مسمعتهاش من أبوها أو أخوها أو جوزها هو ايه السر اللى كان فى ستات زمان؟

ست زمان اللى هى أمى وجدتى , كانت بنت مطيعة وهادية وحنينة بس كان أخوها الولد أحسن منها فى كل حاجة من وجهة نظر كل اللى حواليتها , كانت زوجة راضية وقنوعة و ست بيت من الدرجة الأولى بس كانت كلمتها لا بتقدم ولا بتأخر , الكلمة كانت كلمة الراجل وبس ست زمان كانت تستاهل أكثر من كدة بس اللى حواليتها كانوا مش شايفينها

كانت أرق بنت وأرقى أم وأحن جدة , كانت هى أساس كل شئ جميل بس كانت على الهامش اتعودت تدى ومتاخودش , تتعب ومتشكيش , تتظلم ومتقولش ليه!؟

ولما بدأت الست تفوء واحدة واحدة وتدور على حريتها وكيانها بدأت تظهر عيوبها وتتنسى مميزاتها لأن ببساطة مميزاتها فى نظر غيرها كانت هى نسيان حقوقها

ست زمان هى هى نفسها ست دلوقتى بس بدأت تستغل ذكائها وطاقتها ووتنفع نفسها وبيتها وبلدها

الست حاولت تفهم المجتمع انما كتر كبير وطاقة مهولة مينفعش تفضل محصورة فى وظيفة واحدة

وهي تقدر تدى أكثر

بس بصراحة .. احنا انضحك علينا يا رجالة؟؟

لما طلبنا حقوقنا وحریتنا وکیانا فضلوا يعترضوا ويقفوا فى طریقنا وفى الآخر لما زهقوا من عنادنا
ومثابرتنا

قالوا خلاص ریحوهم وشیلونا الجمل بما حمل

عاوزین شغل طیب اشتغلوا بس هتشاركو فى مصروف البيت , عاوزین حرية طیب خودوها بس
بيتك وجوزك مینقصهوش حاجة ومنسمعکیش بتشتكى من التعب , عاوزین کیان من عیننا الاتین
بس ولادك مسئولیتك من أكل لتربية لمدارس لتعليم ولو نجحوا أو فشلوا انتی المتحملة المسئولیه
بقت الست محتارة مش عارفة تفرح ولا تندم , لدرجة ان فى ستات بقوا يتحسروا على زمان وایام
زمان وان الست كانت فى نعمة كبيرة

كانت تصحى الصبح تحلب الجاموسة وتزغط البطين و تستنى جوزها یجیبها الحاجات اللى هتطبخ
بیها النهاردة وتطبخ وتغدى العیال وتقعده شویة فى الطراوة قدام البيت تتكلم وتدرش مع جیرانها ,
وعلى المغرب تكون راشة البيت فلیت علشان الناموس والديان یطفشوا, وعلى بعد العشا تكون
معشیه العیال ومنیماهم وتسال أبو العیال مش عاوز حاجة قبل ما انام ؟ وكانت تحط دماغها على
المخدة وتنام فى لحظة ماهی مش شاغلة دماغها بحاجة ولا حامله هم حاجة

دلوقتی الست تصحى من النوم بدل ما تحلب الجاموسة بتفتح التلاجة وتطلع علبة اللبن الجاهزة
وتحضر الفطار لجوزها وأولادها , بس فى المقابل تنزل توصل الأولاد لمدارسهم فى سكتها وهی رایحة
شغلها , وتروح على الشغل لو متأخرة ٥ دقائق يتحرق دمها من مديرها ويتقالها لما انتوا مش أد
الشغل بتشتغلوا لیه ما تقعدوا فى بیوتكم

تخلص یوم طویل من الشغل وحرقة الدم وتركب الأتوییس علشان تروح بیئها بسرعة قبل ما جوزها

يرجع تقابل واحد سمج و غلس يحاول يعاكسها , إن سكتت يتمادى ولو نطقت واعترضت يتقالها
وانتى ايه اللى خرجك من بيتك ؟ مدام خرجتى بيقا تستحملى

تعدى تجيب الولاد من مدارسهم وتروح البيت بعد ما جوزها التعبان الهلكان فى شغله وصل قبلها
بعشر دقائق ومستعد لها بمحاضرة الإهمال والتقصير والفشل فى ادارة بيتها وتوفير احتياجات جوزها
وأولادها , وازاى لسه هتسخنى الغدا , مسختيهوش ليه وانتى بتتخانقى فى الأتوبيس ؟ شئ عجيب
والله !!!

وبعد الغدا كل البيت ينام ماعدا هى لأن المطبخ لسه عاوزله ساعتين تشطيب ولسه فى غسيل عاوز
يتغسل وكوم هدوم عاوزه تتكوى , وبعد كل ده تذاكر للولاد وتساعدهم فى حل الواجبات
وجوزها قاعد يتفرج على التيلفزيون أو يلبس ويخرج يفك نفسه شوية على القهوة مع اصحابه , دا
أبسط حقوقه

وآخر الليل بعد انتهاء معركة اليوم بسلام والسريير بيقولها هيت لك , تلاقى أبو العيال راجع
بيتمختر وعاوز يتعشى ويقعد يدردش معاها شوية ولو حس بس انها باين عليها شوية تعب يسمم
بدنها بكلمتين ويقولها دانقى ست بتموتى فى النكد وممكن يحسسها ان دافن نفسه معاها بالحيا ولو حد
تانى مكانه كان اتجوز عليها من بدرى بس هو بصراحة راجل أصيل وصابر عليها وعلى نكدها ,
وتتقال المحاضرة المشهورة عن زمان وستات زمان واننا ستات خايين ومبنستحملش

بقينا مش عارفين هو احنا أخذنا حقوقنا بجد ولا هما ادونا واجبات غيرنا وضحكوا علينا وقالونا
عليها حقوق !!؟

لو سكتنا كل يوم واجبتنا بتزيد وحقوقنا بتضيع ولو اعتراضنا يقولوا انتوا اللى عملتوا فى نفسكم
كدة

هو احنا اتدبسنا ولا ايه؟؟

احنا كنا عاوزين نفهم المجتمع ان الحياة مشاركة وان لكل واحد فينا حقوق وواجبات ولازم كل واحد فينا يقوم بواجباته قبل ما يطالب بحقوقه , علشان المركب تمشي

مشكلتنا الحقيقية اننا بنتطوع في حاجات كتير علشان نسعد غيرنا ولما اللي حوالينا بيتعودو مننا على كدة بيبدأو يفرضوها علينا ولو في يوم بطلنا نعملها بنتهم بالتقصير والإهمال

مين قال ان كل ستات زمان مكانوش بيشتغلوا ويتعابوا , كانت الست بتشتغل مع جوزها في الأرض والدكان والبيت كانت ايديها يايدة في كل حاجة ومكنش عندها اختيار تاني , الشغل والتعب عمره ما كان جديد على الستات بس التقدير هو المطلوب

دايما تقولوا هما الستات دول عاوزين ايه !!؟

الست زمان ودلوقتي ابسط كتير مما تتخيلوا , مهما اشتكت ومهما حسست بالظلم , كلمة حلوة تصبرها وردة جميلة تسعدها طبخة على كتفها آخر الليل تهون كل تعبها , انتوا بس اللي مش فاهمينها

الثانوية العامة... ..

هناء محمود

البيع .. أيووووة بيع زمان وبيع دلوقتي .. الثانوية العامة طبعاً

زمان الثانوية العامة كانت بيع الطالب لواحد , أما والده ووالدته كانوا كفاية إنهم يهياؤله الجو المناسب للمذاكرة ويرفعوا ايديهم للسما ويدعوله .. طالب الثانوية العامة أيام زمان كان بيعتمد على نفسه بس , كان شاب كدة طول بعرض بيروح المدرسة كل يوووم , انتوا متخيلين المعجزة كل يوووم , بيقعد في الفصل مركز ومعاه كل كتبه وكرساته ,

باصص لمدرسه خايف أى كلمة أو معلومة تفوته دى ثانوية عامة مش لعب عيال , يرجع على البيت يادوب ياكل لقمة ويقعد مكفى على مكتبه يراجع ويذاكر كل إللى أخده في المدرسة بالساعات , وبعد شوية تدخل عليه والدته بصنية الساندوتشات وتخطهاله على المكتب وتقوله ربنا ينجحك يا جيبى ويوفقك وميضيعش تعبك يا ابن عمرى , وبعدين تدخل تنام

ويفضل على النظام ده سنة بحالها من البيت للمدرسة ومن المدرسة للبيت , ويوم الامتحان بقا كل واحد في مكانه محدش يقدر يتلفت يمين ولا شمال , دى ثانوية عاااااا يا بشر , ويرجع الطالب من الامتحان على البيت ويبدأ مذاكرة في المادة الللى بعدها علشان ميضيعش وقت

زمان كانوا بيذيعوا نتيجة الثانوية العامة في الراديو بأرقام الجلوس , كان الكل يقعد جمب الراديو محدش يطلع نفس وكله مركز مع اسم المدرسة ورقم الجلوس , ولو المجموع زاد عن ال ٧٠ في المية بيبقا فرح وهيصة وزغاريت , خلاص الواد هبيقا دكتور أو مهندس , حتى الللى كان بييجب مجموع أقل من كدة كانوا بيفرحوا بردوا ماهى كل الكليات كانت حلوة والطالب بيخرج منها يشتغل

للأسف ممكن ينقلوها لإبنهم غضب عنهم , بس هو دا بقا الحال دلوقتي هنعمل ايه

يدخل الطالب دلوقتي يمتحن بعد مجهود ومذاكرة سنة بحالها وفلوس بتندفع هنا وهناك , ويص في الامتحان يلاقى نفسه مش فاهم حاجة وفوق كل ده يلاقى ناس تانية بتعش في لجنة الامتحان ومحدش قادر يمنعهم , وسائل الغش بقت كتيير أوى , بس أكثر حاجة بتحصل دلوقتي الغش بالموبايلات , يعنى الطالب يحط السماعه في ودنه وفي حد برا اللجنة بيكلمه ويمليه كل الاجابات , بتحصل والله متستغربوش دا ممكن ناس برا اللجنة يغششوا الولاد بالميكروفونات إحنا في زمن العجائب , طبعاً مش كل اللجان ممكن تسمح بكدة بس بتحصل

يخلص الامتحان والأباء والأمهات مستنين ولادهم برا وأول ما يبصوا في وشهم بعد الامتحان يبدأ النحيب والعياط والنهنية دا لو مكش فيه إغماءات , طبعاً أى أب أو أم يبشوفوا كده مش بيبقا عندهم غير إحساس واحد شقا عمرى ضائع

بتعدى أيام الإمتحانات زى ما بتعدى بتوترها وبقلقها وبتبدأ في انتظار النتيجة , النتيجة دلوقتي خلاص مبقتش في الراديو دى بتيجى من النت ماهو الزمن اتطور يا جماعة والراديو بقا موضه قديمه , نت دلوقتي هو البلورة السحرية اللي من خلالها نقدر نشوف كل حاجة , دلوقتي بقا اللي بيحجب ٧٠ في المية بدل ما أمه تزغرتله بترقع بالصوت , ما هى مصيبة الواد مش هيعرف حتى يفتح عصارة قصب بالمجموع ده , المجموع اللي كان بيدخل طب زمان ,

الناس تروح تبارك دلوقتي يلاقوا الأب قاعد مكشر و الأم قاعده رابطة دماغها وعنيها وارمة من العياط .. ما لك ياختى ؟ .. الواد جاب تسعين في المية مستقبله ضاع , يقولوها قلبنا عندك يا حبيبتي ويواسوها ويروحوا

دلوقتي علشان تبقا مطمئن انك ممكن تدخل الكلية اللي انت عاوزها مجموعك لازم يبقا معدى ال ١٠٠ في المية , حتى التسعينات والتمانينات بقت كارثة , وياريت اللي يدخل كلية بعد كدة بيبقى

شغل بسهولة خلاص الحال مبقاش زى الحال

انتوا عارفين ليه ؟ علشان احنا مش عارفين قدراتنا فين , ولا بندور على الشئ اللي بنحبه إنما دايمًا
بنمشى ورا غيرنا ونشوف الناس رايحة فين وبنروح وراهم من غير ما نفكر

لو كل واحد حدد هدفه وعرف هو عاوز ايه وحابب يكون ايه بجد , حتى لو دخل كليه غير اللي
بيسموها كليات القمة بس حابب المجال ده , أكيد هيتميز فيها وهيضيف ليها وهيقدر يلاقى فرصته
وحاجات كتير أوى هتتغير دلوقتي , بس لو نفهم بجد هنرتاح كتير

كنا بنعدى بامان واحنا مطمئنين ومتاكدين ان ما فيش واحد ممكن يكسر الاشاره ويشلنا لا قدر الله او واحد داخل على اليمين مثلا فقرر ياخذها من اقصى الشمال لليمين ويشيل في وشه كام واحد من الى بيعدو زى الحوادث الى بنشوفها وبنسمع عليها دلوقتي

فاكره مره كنت بتفرج على فيلم عربي وحسن يوسف ماشى فى الفيلم على اقصى سرعه ٦٠ وكان هيعمل حدثه مروعه على حد قوله فى الفيلم وكان ده فى الوقت ده مثال للشباب المستهتر الى عنده انفلات اخلاقى يعنى الى ماشى على سرعه ٦٠ كان المنحل زمان انما الى ماشى على ١٤٠ دلوقتي ده بقى اسمه ايه يسموه الانحلال نفسه طبعا ده على الطرق المفتوحه

انما الحمد لله واحمد ربنا ان دلوقتي الدنيا زحمة لاننا كنا هنسمع عن حوادث ابشع بكثير من الى بنسمع عنها دلوقتي نتيجة للسرعه الرهيبه الى الناس بقيت بتمشى بيها

زمان كانت الاشاره بتحترم يعنى ما فيش حد ممكن يفكر يكسر اشاره وكمان للحق كان فى رصيف للناس تمشى عليه... اه والله الرصيف ده تسمعوه عنه المكان الى هو بيبقى اعلى من الشارع شويه ويبقى مرصوف بحجاره ابيض واسواد المكان ده الى دلوقتي مفرووش بضايح وباعه جائلين ده كان زمان مخصص للناس عشان تمشى عليه والشارع للعربيات

للحق زمان كان فى اخلاق حلوه بين الناس يعنى ما كنتش بتلاقى واحد سايق بيكسر على الى جامبه عشان يعدى منه ولا تلاقى واحد سايق قرر خير الله ما اجعله خير انه يجيب الشارع من اقصى اليمين للاقصى الشمال يلف ولا تلاقى سواق ميكروباص وقف الشارع كله عشان يركب زبون فى نص الشارع ولا تلاقى الميكروبصات واقفه ٤ حارات وسايه حاره واحده بس للعربيات تعدى ده ازاي سابوها اصلا ومكانوش قفلين الشارع كله والجدع الى يفتح بقه بقى

ما كنتش تلاقى سواقين المينباصات بزنفوو على بعض فى الطريق عشان يركبو الزباين كان الطريق للعربيات حقيقى يعنى ما كنتش تلاقى صاحب محل فارش استندات الهدوم ٤ متر فى الشارع وبيعرض عليها بضاعته بلطجه كده كانت الشوارع رايقه للحق ما كانتش الزحمة فيها قاتله زى

دلوقتي ولا كان فيها حاجه تخنق زى المحور مثلا ولا حاجه استغفر الله العظيم زى صلاح سالم كده والناس كانت بتستحمل بعضها..

تلاقى الى سابق عربيته يقف يعدى الناس الى ماشيه كنت تلاقى الناس الى ماشيه ملتزمين بانهم يمشو على الرصيف مش ماشيين فى وسط الشارع زى دلوقتي وبيتخانقو مع العربيات ماهو الرصيف بقى مش فاضى او تقريبا انقرض الناس كانت زمان وشوشها مبتسمه وهما ماشيين فى الشارع بيسلمو على بعض ويمكن كمان بيرمو السلام على الى ما يعرفهوش

كان فى مكان مخصص لكل حاجه كان فى موقف للاتوبيس ومكان مخصص للميكروبصت ومكانش فيع كارته اسمها توكتوك موجوده زمان الصراحه هذاالاختراع العجيب الى بيتسبب فى اكثر كم حوادث شافها التاريخ اهو ده الى يقولو عليه قد الكف ويدوخ ميه والى حقيقى اختراع جبار مش هنكر انه بيحل ازمة الموصلات فى الشوارع الضيقه لكن لما بيخرج للشوارع الرئيسيه بيتسبب فى كوارث

ناووووووى بقى

بقت الشوارع حاجه كده استغفر الله العظيم .. تنزل من بيتك لايبك ولا عليك تلاقى عربيتك مخبوطه وهى واقفه فى مكانها عادى جدااا وبمجرد ما تقرا الفاتحه والموعوذتين وتستودع اهلك وتبتدى تتحرك تلاقى الشارع فيه كمية تلاحم رهيبه صراحة الناس متحده مع العربيات مع الموتسيكلات مع الاتوبيسات مع العربيات الكارو وكل ده فى مشهد رهيب متواصل طول الوقت سواء نزلت الصبح او الظهر او العصر عادى جداا وتلاقى الناس الى ماشيين فى الشارع على وشوشهم كده نظره غريبه .. ما بين (ربنا يعدى اليوم ده على خير) او (ياشر اشتر) والنوع ده ممكن يتخانق معاك لجرد انك قولتله صباح الخير مثلا وباقيه البشر تلاقىهم بيضربو اسداس فى احماس من كتر الزحمه ولا مؤاخذه بيلعنو الزحمه والى خالهم يتزلو من بيوتهم من خنقتهم وتواجه بقى مصيرك المحتوم

لو حظك كويس المشوار الى زمان كان بياخد ١٠ دقائق ناووو بيخدوله ساعتين ده لو الشوارع رايقه وكان حظك كويس وكان مشوارك مش هتضطر تمشى فيه من المحور او الدائرى او يبقى حظك زى الزفت وتضطر تطلع كوبرى اكتوبر فى الوقت ده لازم تكون مصلى صلواتك جمع وقصر وعامل حسابك فى فطارك لو خرجت الظهر عشان ممكن بعون الله توصل على العشاء كده ومظبط حالك ومواعيدك الى طبعاً مش هتروحها طبعاً

لو قاعدت احكيلكم من هنا لكره على مشاكل واداب المرور الى ما بقيتش موجوده مش هنخلص بس كفايه ان الواحد وهو سايق بيبقى نفسه يسيب العربيه ويتزل يمشى على رجليه ..

ماهو اكيد هيوصل اسرع ولا هيفضل ساعتين يدور على مكان للركنه .. زمان كانت الدنيا روقان .. كان الشارع ليه احترام .. كان الواحد يخرج يتفسح مش شايل هم الزحمه ولا البهدله الى هتحصل لو اضطر يخرج من بيته ويمكن الناس كلها هتشاركنى رائي انه لولا اشغالنا ما كانش حد فكر يتزل من بيته ويواجه مغامرات الطريق ناوووووووو

لا ومن المقدسات مسلسل الساعه ٧ كان الناس بتحدد مواعيدها

بعد المسلسل ولا قبله

لكن وقت المسلسل كان ممنوع الاقتراب او التصوير

ويوم الجمعة نستنى سينما الاطفال الساعه ١٠ عشان نشوف لاسى

ماما نجوى وبقلظ

عروستى وماما سامية شرابي

تليماتش،

بابا ماجد ومنى عبدالمقصود

واليس في بلاد العجائب وبني باني

كرتون زمان جريندايزر ومازنجر

الاغانى الى كنت لسه قريب بعينها للاولادى

سوسه كف عروسه وكوكو واوا كوكو واو

والشمس الرتقانى عليها ليا سنه

يا اصحابى وصحاباتى اصفاء ابو السعود

والبرامج الى كنا حفظين مواعيدها زى ما حفظين اسمائنا

زووم لسلمى الشماع

والعلم والايمان كل يوم ثلاثاء

والمسلسلات ليالى الحلمية والشهد والدموع وابوالعلا البشري وانا وانت وبابا في المشمش ولبله
القبض على فاطمة

مسرحيات زمان مدرسة المشاغبين والعيال كبرت وريا وسكينة وانما حقا عائله محترمه وفؤاد
المهندس وشويكار وعبدالمنعم مدبولي

افلام زمان الجميله الابيض والاسود اسماعيل ياسين والنابلسي وزينات صدقي و...

ولا الاغاني وسهرة كل يوم خميس والرائعه ام كلثوم

حتى بعد وفاتها كانوا يبذعوها على الراديو كل خميس

وكانت بتكون احلى سهره وبابا وماما سهرانين في التراس بيشربو الشاي وييسمعو الست

مش عاوزه اقولكم ان المشهد ده بالنسبه ليا احلى ذكريات حياتي

انما دلوقتي ,,اقول ايه عن التلفزيون دلوقتي كل الى فيه فاسكونيا

اه والله فين وفين عقبال ما الواحد يلاقى مسلسل كويس ولا برنامج هادف يتفرج عليه

طبعاً غير ال ١٣٠٠ قناة فاضيه الى الواحد بيقعد يقرب ما بينها لحد ما الريموت يضع فيقنع نفسه
ان الى شغال هو افضل حاجه

ولا المسلسلات الى كلها اسفاف وعري والله الواحد بيحزن على حال الفن والتفزيون

ينفع اننا دلوقتي بنمنع الاولاد انهم يتفرجو على المسلسلات لانها وخالني مؤدبه (للكبار فقط)

يعنى زمان كنا بنخاف على الاولاد من القمر الاوربي دلوقتي بنترعب من المشاهد الى في المسلسلات

العربي

ونسبيهم يتفرجو على المسلسلات الكومديه بس عشان بتكون ملمومه شويه

وما فيهاش اسفاف

طبعا انا مش بعمم بس التلفزيون بيوصل لكل البيوت

وبقى فيه حاجات صعب على الكبير يشوفها

وفين وفين لما نلاقى حاجه حلوه نتفرج عليها

بجد انا بدعو كل المنتجين والفنانين والكتاب انهم يتانو اووى فى الاعمال الى بيقدموها

عشان ترتقى بفكر المجتمع المصرى ونرجع لينا الرياده زى زمان

وترجع الاسره تتلم حوالين المسلسل الواحد تتفرج عليه زى زمان بدون خوف من اى حاجه تخدش

الحياء

الكومديه الصافيه الجميله الى تخلينا نضحك من قلبنا

ويفضل ارتباطنا بالتلفزيون زى زمان

الجيران ...

هناء محمود

من مبهجات الحياة لما تبقا قاعد فى بيتك وتسمع زغرودة جاية من بيت الجيران , حتى لو كنت حزين بتحس انك فرحت لأن فى حد تانى فرحان , زمان كان الطبيعى بعد ما تسمع زغرودة جاية من بيت الجار اللي جيبك انك تلاقى والدتك لبست عبايتها وطرحتها وفتحت الباب وعلى بيت الجيران عدل من غير دعوة , ويمكن كمان تزغرت فى سكتها وهى رايحة , ولما توصل بيت الجيران تقول ألف الف مبروك من غير ما تعرف هو فيه ايه , وبعد كدة تبقا تسأل وتقول خير فرحونا معاكو .

وتتلم الجيران ويهيصوا مع بعض ويزغرتوا مع بعض ويخلوا الفرحة فرحتين , بقلوبهم الصافية ونفوسهم الراضية اللي كانت بتتمنى الخير لبعضها

زمان لو حد سمع صوت بكا جاي من عند الجيران الكل بيحجرى عليهم وهو يبكى من غير ما يفهم هو فى ايه ؟ ويقفوا جنبهم ويواسوهم , ولو حد محتاج حاجة يلاقى ميت واحد يقضيها له

أما الخناقات الزوجية زمان بقا كانت حاجة تانية .. أول ما يسمعوا صوت واحد بيتخانئ مع مراته , واحدة من الجيران تتطوع وجرى على بيت الخناءة علشان تقولهم استهدوا بالله وبلاش فضايح , بس بتكتشف أول ما توصل عند الجيران انها المتطوعة رقم عشرين مثلا .. خمسة ماسكين الزوج وخمسة ماسكين الزوجة ودا يقوله عيب ما يصحش ودول يقولوها دا مهما كان جوزك بردو , وعشرة واقفين يقولوا لا حول ولا قوة الا بالله والله دى عين وصابتكم

بس مش بيسيبيوهم غير وهما متصالحين ويضحكوا ويهزروا كمان ويمكن يعملوهم عشا قبل ما يمشوا

زمان كانوا الجيران أحسن من الأهل , كانت الست لو رايحة اى مشوار أو رايحة السوق مثلا تخط

على جارتما وتسيب ولادها عندها وتقولها مش عاوزانى أجيبلك أى حاجة من السوق وانا جاية ؟
كانت الست زمان وهى واقفة فى المطبخ لو لاقى أى حاجة نقصاها تنده على جارتما أم شيماء ولا
أم هند من شباك المطبخ وتقولها انا عاوزة بصلتين أو لمونة أو شوية ملح هبعثلك البت تاخودهم
وتلاقى بنتها راجعة معاها بدل البصلة اربعة وبدل اللمونة خمسة وبدل شوية الملح كيس بحاله , لأنها
عارفة انها مردودة و جارتما مش بتأخر عنها حاجة لو احتاجتها

اتكلمنا عن اللمة كثير ومش هنقدر نطل كلام عنها لأنها من أهم مميزات ناس زمان ,

الناس كانوا بيتلكوا علشان يتجمعوا , لو واحدة هتجمع شوية بامية أو هتقطف ملووخية كانت
تاخذ الصينية وتروح لجارتما علشان يتسلوا مع بعض , لو واحدة معدية بالصدفة على جارتما
وشافتها بتعمل محشى كانت تشمر وتلف معاها المحشى من غير ما حد يطلب منها كانوا تصرف لا
إرادى , حتى فى الفرجة على التيليفزيون كانوا يندوها على بعض , المسلسل هبدأ ما تيجى تتفرجى
معها , زمان كان اللي معندوش أهل أو مقطوع من شجرة كان بيلاقى فى جيرانه الأهل والسند
زمان كانت الجيران لبعضها مش ملهاش دعوة ببعضها زى دلوقتى , الكل رافع شعار كل واحد
فى حاله , بقا فى بيوتنا وسامعين زغاريت من بيت الجيران ونقول واحنا مالنا دول عالم رايقة مش
حاسين ببلوى الناس احنا فينا اللي مكفينا

لو سمعنا بكا , نقول مش ناقصين نكد , خالينا فى حالنا ,

انما الخناات ليها وضع آخر فى زمانا ده , احنا طبعاً مبندخلش ورافعين شعار كل واحد فى حاله ,
بس مفيش مانع اننا نفتح الشبايك والبلكونات ونقعد قريب منها علشان نسمع الخنااة بالتفصيل ,
علشان لو جارتى سونيا ولا نانى طلبتى أقدر أحكيها كل اللي حصل ولو هى سمعت حاجة انا
مقدرتش أسمعها يبقى نكمل الحكاية لبعض , والبلد كلها تعرف ان فلان وفلانة اتخانقوا مع بعض
علشان كذا وكذا وتحت شعار ملناش دعوة دع الخلق للخالق ..

زمان لو حد اتوفى فى الشارع كانوا الجيران يحكموا على نفسهم ميفتحوش التيلفزيون حوالى اسبوع
ولو فتحوه علشان أطفالهم يقولوهم وطوا الصوت متفضحوناش , خايفين على مشاعر بعض ,
دلوقتى بنشوف العزا منصوب فى الشارع وصوت الأغاني خارج من بيت الجيران كأن عندهم حفلة
, ولازم حد يروحلهم مخصوص علشان يقولهم معلىش يا جماعة فى عزا تحت ياريت تيجو على
نفسكوا شوية وتوطوا الصوت , ويقولوا حاضر وهما متضررين

زمان كانوا الجيران ممكن يأجلوا فرح بنتهم علشان حد من الجيران مريض أو حزين على شخص
فقدته , دلوقتى مبقتش بتفرق إحنا ما بنصدق نفرح لسه هنراعى مشاعر الجيران , كل واحد مع
نفسه داخنا ممكن نخبط على الجار ده ونقوله عاوزين نعلق فرع نور على بلكونتك ولو اعترض
نتخانى

كل واحد قافل باب بيته عليه , عنده حكاياته وهمومه وملهى فى حاله وبتهيأله انه كدة بقا بعيد عن
وجع الدماغ , ونرجع نسأل نفسنا هو احنا ليه بقينا مش قادرين نفرح زى زمان , ليه الحياه
مبقالهش طعم , ليه كل شى بقا عادى وممل

عارفين ليه ؟

لأن الحزن لما بنشاركوا مع غيرنا حمله من على قلوبنا بيخف , والفرح لما بنقسموا مع غيرنا السعادة
بتزيد وإحنا قررنا نحزن لواحدنا ونفرح لواحدنا كدة همومنا بقت أكبر وفرحنا بقا ملوش
طعم

بتتججج ان مفيش وقت وإن الناس اتغيرت , وناسيين إن لو كل واحد بدأ بنفسه كل اللى اتغير
للأسوأ هيرجع حلو زى زمان

الحمل والولادة ...

هناء محمود

قال على رأى المثل " البكرية عروسة مجليه " " ومتبانس البضاعة إلا بعد الحمل والرضاعة "

دا كان زمان , زمان كانوا بيقولوا البكرية عروسه مجلية يعنى الست المتجوزة بتكون فى حملها الأولانى زى العروسة بالظبط مفرفشة كدة وحلوة ومش باين عليها اى تعب , ومتبانس البضاعة الا بعد الحمل والرضاعة يعنى اللى صحتها كويسة وبتستحمل بتبان بعد ما تحمل وتولد وتربى وبتفضل صحتها حلوة , واللى صحتها على أدها ونص نص مبتستحملش وبيبان عليها التعب علطول .

بس زى ما الأمثال دى قالوها زمان فهى مبتنطبقش بصراحة غير على أهل زمان , لأنهم كانوا متغذيين وشافوا الخير كله مش زى حالاتنا متربيين على الأكل البلاستيك وصحتنا على قدنا

الحاجة الوحيدة اللى مازالت مشتركة بين أهل زمان ودلوقتى هو السؤال اللولبى اللى بتسأله البنت بعد جوازها بشهر واحد يادوب , مفيش حاجة فى السكة؟؟

بس زمان لو اتأخرت الست فى الحمل بيقا اكيد السبب منها لأنه عيب أوى إن اى حد يفكر ان الراجل ممكن يكون هو السبب دا كدة بيقا بيظعنوه فى رجولته

وتبدأ الجولة الحرة على الدايات وذوات الخبرة فى المجال ده , وكل واحدة تقول للزوجة وصفة من هنا وخططة من هنا علشان تحمل , وآخر حاجة ممكن يفكروا فيها هى اللجوء للدكتور , دا ان فكروا أصلا .

وممكن الراجل يتجوز على مراته واحدة واتنين وتلاتة علشان يخلف وهو أصلا العيب منه بس

مستحيل يروح لدكتور ,, مقولنا عييب ميصحش , احتمال كبير ان الثلاثة اللي تجوزهم يقا هما
اللي ميخلفوش, انما هو مستحيل هو صاغ سليم دا راجل يا جماعة

إكتشاف الحمل زمان كان معتمد على ظهور الأعراض على الست , أول بس ما تقول داينة
ونفسى غامة عليا تروح حماها مشغلة قرون الاستشعار ولفة حواليتها لفتين , وسألها كام سؤال ,
وتقولها مبروك انتى حامل

وبعد شهر ولا حاجة ممكن يبقوا بيعتوا للداية تبص عليها بصبه وتاخذ الحلاوة وبس على كدة
ولا كان فيه متابعة حمل ولا سونار ولا دياولو , محدش كان بيعرف نوع الجنين الا يوم الولاده ,
علشان كدة كان ليها فرحتها

كانت أول ما الست تحس إنها هتولد تنده على أمها أو حماها بسرعة أو جارها الحقييني يا أم فلان أنا
شكلى بولد , واللى موجود يشمر دراعه ويقول لحد تانى يسخن شوية مائة , ويبعتوا البت الصغيرة
.. إجرى يا بت اندهى على أم السعد الداية بسرعة

والجيران والأهل يتلموا والداية تيجى تخلص المأمورية بتاعتها وتولد البنية , وتاخذ حلاوتها على
حسب المولود طبعاً لو كان ولد الحلاوة بتبقا كبيرة أووى , ماهو من امثال زمان لما قالولي ده
ولد ... انشد ضهري وانفرد ... لما قالولي دي بنية... وقعت الحيطه عليا , مااا علينا

الغيل يطلع من بطن أمه من هنا ويدخل بداله فرختين بلدى من هنا , وكوبيتين مغات بالسمنة
البلدى , ومش بعيد تلاقى الست اللي لسه والده الصبح واقفة فى المطبخ تحضر العشا لجوزها بالليل
, ماحنا كنا بنسمع من جدتنا أساطير بتحسنا أد ايه كانوا متغذين وصحتهم حلوة مش زى
حالاتنا يا كبدى علينا شوية برد بييجيونا الأرض

ولا كان وقتها يسمعو عن حضانات ولا لبن صناعى ولا بامبرز , ولا الاختراعات دى كلها ,
والعيال تكبر كدة بسم الله ما شاء الله وتلاقى الواد مررب كدة وخدوده مقلبطة وضاغطة على

بوءه وعامل كدهو .. والواحدة تجيب بدل العيل عشرة بنفس الطريقة , صحتهم كانت مساعداهم
احنا مالنا بقا

الواحدة في زمانا ده بعد ما تتجوز بأسبوع هي اللي بتبدأ تقلق على نفسها وتقول يا ترى هحمل ولا
لا , أنا خايفة يكون عندي مشكلة , وتحاول تيجي على نفسها وتصبر شهر ولو محصلش حمل , هي
وجوزها على الدكتور عدل , ياترى احنا كويسين يا دكتور ؟ ولو اتأخر الحمل كمان شوية في
سكك كثير دلوقتي طبية وعلمية غير وصفات زمان , دا غير الحاجات اللي أهل زمان عمرهم ما
سمعوا عنها زى الحقن المجهرى والتلقيح الصناعى

ووقت ما يحصل الحمل بقا سهل اوى ان الست تعرف عن طريق اختبار الحمل المتزلى وبعد كدة
لازم تعمل متابعة عند الدكتور زيارة مرة في الأسبوع وبالسونار تعرف على الشهر الرابع او الخامس
اذا كان البيبي ولد ولا بنت , دا في دلوقتي ناس بتروح للدكتور قبل ما تحمل وتقوله أنا عاوزة أحمل
في ولد أو في بنت أو انا عاوزة توأم سبحانك ياربى , التطور حلو بردو ومفيد بس مش للدرجادى
.. يا ناس احمدا ربنا ومنتسوش ان دى أرزاق واللى له نصيب في حاجة هياخذها

طبعا دلوقتي الوضع اختلف خالص وأول ما الست تحس انها هتولد على المستشفى عدل وكل شئ
بيكون تحت اشراف طبي وعناية مختلفة عن زمان

زمان اول ما عرفوا العمليات القيصرية كانت بالنسبالم مصيبة لو الدكتور قال للست انه مضطر
يولدها قيصرى

يا نهار ملوش ملامح , والناس يقولوا هيشقوها بطنها يا قلب أختها وبتقلب مناخة

دلوقتي بقت الولادة القيصرية موضه , والست الحامل نفسها هي اللي بتطلبها , من منطلق ليه أولد
فجأة و أفضل أصوت وأعض في مخدات , لما ممكن أبقا عارفة معاد ولادتي وآخذ شنطتي كدة
وأروح على المستشفى ويدونى بنج ويطلعوا البيبي وأنا محافظة على برستيجمي

بس بجد اللى أختلف كتير عن زمان وبقا أحسن دلوقتى هو نظرة الناس للمولودة البنت , مبقتش
تميل الحيطه عليهم ولا حاجة , بالعكس بقينا بنقول دلوقتى اللى مخلفش بنات مشبعش من الحنية ولا
داقش الحلويات

طبعاً هو فى أحن وأجمل من البنات , دى البنوتة هى اللى بتخلى للبيت بهجة وألوان , وطبعاً الولاد
كويسين بس مش زى البنوتة , تحيز بقا

اللى خلف ولاد بس ميفتكروش انه اتحرم من الحنية والى خلف بنات بس ميفتكروش انه اتحرم من
السند , لا فى ولاد حنينين وفى بنات بميت راجل , المهم ان ربنا يرزق كل زوجين بالذرية الصالحة
سواء كانوا ولاد أو بنات

الأمان ...

رؤى كمال

طول الوقت وانا بتكلم عن الفرق بين زمان ودلوقتي كانت كلها حاجات مقدور عليها

يعنى فرووق عاديه نتيجه لعواما اجتماعيه كتيره بتاثر علينا

انما فى حاجه مهمه اوى بنفتقدها كانت زمان بالنسبه لينا من اهم مميزاتنا كمصريين

وهى الامان

زمان كنا مهما الوقت اتاخر الست مننا تقدر تمشى فى الشارع ولا يهملها ولا واحد يتجرا حتى

ويكلمها

ويوم ما حد يعكسها بس تلافى الى يقفله على طول

كان الشارع هيصه ودايما صاحى ..عمرك ما كنت تمشى فى الشارع فى اى وقت وما تلاقى حد

فيه

فى اى مكان فى اى زمان

كنا نطلع انا واخواتى على اسكندرايه ومعانا اولادنا وهما صغيرين كلنا ستات ومافيش معنا اى

راجل

ولو لا قدر الله عربيه عطلت ولا عجلة نامت نلاقى الف من يوقف ويساعدنا حتى واحنا واقفين فى

الصحراء عمرنا ما كنا بنكون قلقلانين وهنقلق من ايه مصر بلد الامان وكل واحد بيحافظ على

بنت بلده

عملانا ما كنا بنقفل باب البيت بالمفتاح اساسا .. يدوبك نرد الباب وننام مطمئين

كنا واحنا صغيرين نفضل نلعب مع اولاد الجيران في الشارع لحد الساعه ٢ بليل

وتى فكره مره ان ولد من جيرانا كنا بتلعب استغمايه واستخبي تحت بير عماره قديمه كده

ومن كتر ما فضل مستخبي راحت عليه نومه واحنا ندور عليه واخر ما غلبنا طلعتا لمامته في البيت

نسالها يمكن يكون طلعلها مامته قائلنا ما تقلوقوش هتلاقوه مستخبي هنا ولا هنا

ولما طول ودخل يجي في ٤ ساعات مامته نزلت تدور معنا عليه

في الشارع وباباه رجع من الشغل قاعد يدور عليه معنا وتقريبا الحته كلها اتقلبت عليه

لحد ما لاقيناه نايم وبيشخر تحت بير السلم بتاع العماره واخذ يعيني علقه نصها مووت

من باباه واتحبس اسبوع في البيت وبعدين نزل يلعب معنا تاني

الى عاوزه اوصلهولكم من الحكايه ان على الرغم اننا فضانا ندور على خالد جارنا ده حوالى ٦

ساعات

لكن ما فيش حد شك مجرد شك انه اتخطف مثلا

لكن الكل كان متأكد انه تايه او مستخبي في مكان ما مننا

من كتر ما كنا حاسيين بالامان وما كناش بنسمع زمان عن حوادث الخطف ولا السرقة الى بنسمع

عنها دلوقتي

زمان كان الكل بيخاف على بعض يعنى لو حد بس صرخ في شقه من الشقق

تلاقى كل الجيران بيخبطو على الباب يطمنو اننا كويسين ومش ممكن يمزلو غير لما كانوا يتأكدو ان

ماما بس كانت بتدينا علقه حلوه ويخلصونا من ايدها .. ماهو انتو بردو ما تعرفوش علق زمان دى
كانت ازاي

المهم اننا كلنا كنا حاسيين بالامان ..عمرنا ما كنا حاسيين بقلق او ان حد مصرى ممكن ياذى
المصرى الى ذيه

انما ناوووووووووووووووووو وياعيني علينا واحنا الى عايشين فى ناوو

الستات بقت تخاف تخرج لواحدها من بعد العشا حتى لو كانت واحده رايحة تزور مامتها

بقت تمشى خايفة على نفسها وعلى اولادها بيقا هين عليها تربط ولادها بسلاسل علشان ميفلتوش
منها

لما حد فينا بقا بيركب تاكسى , بيقا قاعد خايف من سواق التاكسى ومبحلق فى الطريق ليحود بيه
التاكسى هنا ولا هنا والأغرب إن ممكن سواق التاكسى بيقا هو كمان خايف من إالى راكب معاه
ومن قطاع الطرق كمان

لو طفل صغير إختفى لمدة نص ساعة بنقول خلاص ده إتحطف هو دا اول إحتمال بيحى فى بالننا

لو أم اتصلت على ابنها أو بنتها كذا مرة ومردش عليها تقول أكيد جراه حاجة

الناس دلوقتي بقت ثقتهم فى بعض مهزوزة ومعزورين من كتر ما بنسمع ونشوف

الإحتيال والنصب دلوقتي بقاهم مدارس ومدرسين , كل يوم يتكروا طرق جديدة وعجيبة
متخطرش على بال حد

من كتر خوفنا وعدم ثقتنا فى بعض

بقينا بنركب على الابواب ببيان حديد ونقفل الباب بكام قفل ومفتاح

بقت كل بنت خارجة من بيتها معاها السيلف ديفينس بتاعها علشان لو حد إتعرضلها
بدل ما نحكى لأولادنا حكاية الشاطر حسن قبل النوم بقينا نحكيلهم عن اللي بيحصل ونفضل
نحذرهم ونفهمهم يتصرفوا ازاي لو حد حاول ياذيهم
مبقتش عاوزة أرمى اللوم دايمًا على الزمن , لأن إحنا السبب , إحنا إللى بقينا مبنخافش على بعض
ولا بنحب بعض زى زمان
زمان كان كل واحد بيخاف على التاني كأنه هو
كان فى عسكري الدارك بيلف فى الشوارع يقول هاه مين هناك
والناس كانت بتنام متونسة بصوته
نفسى يرجع عسكري الدرك أقصد نفسى يرجع الأمان زى زمان
عاوزين كلنا ندعى ان مصر ترجع تانى بلد الامن والامان
ويرجع لينا راحة البال وخوفنا على بعض زى زمان
وترجع مصر زى ما ذكرها ربنا فى قرانه الكريم وقال (ادخلو مصر ان شاء الله امينين) صدق الله
العظيم

شغل البيت ...

رؤى كمال

الخلوه دى قامت تعجن فى البدرية
والديك بيدن كوكو كوكو فى الفجرية
يجعل صباحكم صباح الخير يا اسطى عطيه
ايه ده هو انا اختصرت الاغنيه
صحيح ده الست زمان كانت بتصحى الفجر على ما الشمس تشقشق تكون دخلت لامؤاخذه
زريبة المواشى

حلبت الجاموسه وطالعه شيله سطل اللبن الطازه
وتدخل على الفرن عارفينه الفرن البلدى تجيب الجاور وتحضر للخبز وتدمسلها شويه فول فى
الفواله الرخام وتجري تصحى بنتاها عشان يقومو يجزرو معاها وبالمقشه الخوص تقش البيت كله فى
لمح البصر

وتقعد هى والبنات يجزرو فى العيش المرحح وتحضر الطبلية اشى بتنجان مقللى على بيض على
بطاطس مهروسه على طبق المش الى يجنن

انا عارفه جوعتكم بس بجد فطار زمان ده كان حاجه محترمه تبر الجسم كده وبعد ما تخلص عيالها
الصبيان يروحو على اشغالهم وتفضل هى والبنات يخلصو شغل البيت والى تاخذ الغسيل
وتفرش القاعده فى الحوش واحتمال تعزم جارتين تلاته يغسلو معاها وتاخذ الغسيل فومين فى
الطشت وبعدها تجلى المواعين بالليفه القش

وبليل الى تخطط والى ترفى والى تاكل الطير عل السطووح حاجه كده مزاج على كل ده مع انه كان
كله شغل يدوى مع ان ما كناش بتلاقى الستات بتشتكى من شغل البيت ولا يمكن عشان ما كناش

مرفهين بس هقول اننا مرتاحين في حاجات وفي الباقي مطحونين وعلى استعداد إني ارجع تاني
واعيش عيشة الست امينه بس بشوية احترام من سى السيد من غير مد الايد وماشيه مع العوالم
والراقصين

على الاقل هنام وانا مرتاح بالى على اولادى انهم مش بيتسقو سموم من ناس مش متربيين

العادات ...

هناء محمود

لكل وقت وزمن عادات في منها إلی بیختفی خالص ومنها الی بیتطور وبتغیر وممكن تظهر عادات تانية خالص مكنتش موجوده زمان أصلا

من عادات زمان في الأفراح (النقوط) یعنی المعازيم يروحو ينقطوا العروسة , ركزو معايا ينقطوها مش ينقطوها في فرق كبير

ينقطوها یعنی وهما رايحين يباركوها كل واحد يكرم مش في إيده مبلغ من الفلوس ويديه للعروسة كل واحد بقا على أد مقدرته بس هما كانوا شايقين ان ده افضل للعريس والعروسة في بداية حياتهم وأى مبلغ هيجمعوه أهو هينفعهم في وقت زنقة , وكانت العروسة توزع على المعازيم الستات طرح أو ايشارات بتكون محضراها في الدولاب بتاعها إلی يجي يباركلها وينقطها تديله منها , والعريس كان يدى معازيمه الرجاله مناديل قماش

, دلوقتي قليل أوى إلی لسه بيعمل كدة و ينقط العروسة بفلوس إنما العادة دى اتطورت وبقت في شكل هدايا كل واحد يشتري هدية للعروسة والعريس على ذوقه تعجبه بقا متعجبوش , يكون محتاجها أو لأ المهم إنما هدية وبس , إنما العروسة مبقتش تدى للمعازيم أى هدية لا منديل قماش ولا حتى كلينكس

من عوايد أفراح زمان بردو هي حلة الاتفاق , دى شئ أساسى هي مش مقصود بيها حلة بجد , إنما هي عبارة عن عشا للعريس والعروسة ليلة الفرح , أم العروسة غالبا هي اللى كانت بتطبخه ولا اإزم العريس والعروسة يكلوا منه سوا علشان يحصل الاتفاق , أكيد عرسان دلوقتي بيتعشوا بردو , بس معدش حد بيسمع عن جملة حلة الاتفاق دى , ممكن العريس والعروسة يتعشوا من أكل

الفندق اللي عملوا فيه الفرحة أو من البوفيه بتاع الفرحة , أهم بيتعشوا وخلص زي كل يوم إنما مش تحت مسمى معين , يتفقوا بقا ولا ميتفقوش كله هيبان بعد كدة

بعد الفرحة بقا لازم نتكلم عن السبوع زمان ودلوقتي , السبوع من العادات اللي محتفتش , بس طريقة إحتفال الناس بيها اتغيرت أوى , زمان لو كان المولود ولد بيشتروله إبريق إنما البنت كانوا بيشتروها قلة , ويزوقوا بقا الابريق والقلة دول بالشموع وبالورد , وكانوا يختاروا اسم المولود بطريقة ظريفة أوى , لو هما مختارين ما بين ٣ أسماء أو أربعة , يجيبوا صينية ويخطوا فيها ٤ شمعات ويسموا كل شمعة بإسم ويستنوا لحد ما كل الشمع يقرب يسبح ويختاروا اسم أطول شمعة لسه مخلصتش , كانوا بيتفائلوا بالحكاية دى , كانوا زمان بيعتوا للداية تحضر السبوع علشان تدق الهون وتفضل تقول اسمك كلام أمك واسمع كلام أبوك ومتسمعش كلام فلان وتخط المولود جوا غربال و تغربله بعزم ما فيها وطبعا العادة دى مضرة أوى ومؤذية للأطفال فى السن ده بس للأسف كانت بتعمل , وكانوا يخطوا الغربال على الأرض والطفل فيه ويخلوا مامته تعدى من فوقه ٧ مرات رايح جاي ويقولوا الأوله بسم الله والثانية بسم الله

فى الآخر بقا يوزعوا على كل الموجودين السبوع اللي هو عبارة عن كيس كدة فيه شوية سودانى وفشار وكراميل من بتاعة زمان وبيعتوا للجيران كمان

دلوقتي السبوع بقا حاجة تانية خالص , بقا سبوع مودرن , أولا اسم المولود ده تقريبا بيكون متحدد قبل البيبي ما يتولد ب شهر لأن مامته بتبقا عارفة بالسونار هو ولد ولا بنت , ومبقاش فيه أبريق ولا قلة بقا فى دلوقتي عريس وعروسه لعبة مخصصة للإحتفال بالسبوع وبتنور وبتغنى واحتمال تطير كمان لو عاوز , دا غير ان بقا فى ناس متخصصين فى تنظيم حفلات السبوع , والهدايا بتاعة السبوع بقت شكل تانى خالص وبقت مكلفة أوى بعد ما كانت شوية حلويات فى كيس بقت عبارة عن تماثيل صغيرة أو صناديق متزخرفة ومعها شيكولاتا , وممكن يطبعوا صور البيبي على فلوس ويوزعوها كمان ,

طبعاً عاداتنا زمان كانوا كثير أوى بس فى عادة تميزوا بيها المصريين زمان عن كل الجنسيات الثانية
وبتضحكى أوى ونفسى أعرف مين اللي اخترعها , وهى كسر القلة , يعنى ايه كسر القلة ؟

يعنى لو واحدة مثلاً متخانقة مع جارقتها أو متضايقه من شخص معين ونفسها متشفهوش تانى , وجه
اليوم اللي الشخص ده هيمشى أو هيعزل من المكان , تيجى الست زمان ماسكة قلة فاضية وواقفة
قدام بيتها أو فى بلكونتها ومستنياه معدى وكاسرة قلة وراه , والله كانوا ناس دمهم خفيف حتى فى
غضبهم

طبعاً معدش فى دلوقتي كدة خالص , ممكن نستخدم اللفظ انما الفعل لأ , إحنا اللي بنضايق منه
دلوقتي بنعمله أن فريند من الفيس بوك بتاعنا أو بلوك ونمسح رقمه من على الموبايل أو نخطه فى
البلاك ليست , الزمن اتغير بردو

زمان الناس مكنتش بتحتفل غير بالعيد الصغير والكبير ومولد النبى , دلوقتي إخترعنا لكل مناسبة
عيد , بقا فيه عيد ميلاد وعيد جواز وعيد حب وعيد أم وكل عيد من دول بنحتفل بيه بشكل
مختلف ولا لازم الهدية , طوووول السنة بنجيب هدايا لبعض , مع اننا طول السنة بنشتكى من بعدنا
عن بعض وإننا مشغولين عن بعض , يمكن علشان كدة إختراعنا المناسبات دى

زمان كانت الناس قريية أوى من بعضها مكانوش محتاجين عيد حب علشان يعرفوا إنهم بيحبوا بعض
ولا كان الإبن محتاج عيد أم علشان يثبت لأمه إنه فاكرها ,

هتفرق ايه مع ابني انى أجيله هدية كبيرة فى عيد ميلاده كل سنة وأنا مشغول عنه طول السنة ,
هتفرق ايه مع أمى انى أفكرها مرة فى السنة وأهتم بيها وأجيلها هديه وهى طول الوقت بتترجاني
انى أزورها وأنا بقول مش فاضى , للأسف دا بقا حالنا دلوقتي

علشان كل واحد فينا مبقاش فاضى حتى يرمى السلام بقينا بنعمل للإهتمام أيام , وعجبي

بمنتهى السهولة هتصور نفسها وهى بتقول للناس انها محبوسة وتحكى حكايتها وترفع الفيديو على اليوتيوب والناس كلها تشوفه وتوصله لحبيبها خليل وكانوا عملوها صفحة على الفيس بوك وسموها كلنا جميلة وخليل ومكنش أبوها قدر يقتلها

يا سلام عليا شوفتوا التوظيف التكنولوجى لما بيقا فى محله , إتعلموا بقا

وربنا يقدرنا على فعل الخير

الأخلاق ...

رؤى كمال

عائزنا نرجع زى زمان قول للزمان ارجع يا زمان

ياااااااااا يا سومه كلامك دائما بييجيب من الاخر

كل حاجه كانت حلوه كانت زمان كل ما بيعدى علينا الوقت تلاقى الحاجات الحلوه بتختفى البركه فى كل شئ بتتلاشى كل حاجه اتغيرت عن زمان وخصوصا الاخلاق مش عارفه احكيلكم ايه عن زمان واخلاق زمان

انا لما بتفرج على افلام الابيض والاسود بقول ياريتنى ارجع اعيش فى الوقت ده ايه الناس دى ايه جاهم واداهم ده ايه الرقه وعدوبه الحديث ده تلاقى الواحد طول بعرض مرسوم كده ومش ممكن يد قبل ابوه وهو ماشى معاه فى الطريق لازم تلاقى الاب ماشى الاول واولاده ماشيين وراه بيتبعو خطاه

كان لايمكن تلاقى بنت صوتها يعلى فى الشارع تحس ان التون معمول على السيلنت او بالكثير يبقى صوتها يدوب مسموع ولا تلاق شلة بنات ماشيين وصوت ضحكهم جايب للاخر الشارع ولا تلاقى شلة شباب واقفين على الناصيه بيعاكسو الى رايحه والى جايه لو واحد تجراء ورفع عينه على بنت احتمال يتعلق على باب الشارع

عارفين مسلسل ليالى الحلميه.. ولا انتو ما توعوش عليه.. هحكيلكم انا لما هشام سليم عاكس بنت المعلم زهم السماحى اتحلقللو شعره على الزيرو.. على الرغم انه فى المسلسل كان طالع بدور ابن الباشا سليم البدرى طبعاً الاجيال الكبيره شويه هى الى توعا على المسلسلات دى والاخلاق الى

كانت في المسلسلات دى كانت تجسيد لاخلاق المصريين بجد الشهامه والمروءه والادب والصوت
الواطى والكسووف

دى كانت اخلاق زمان مش ممكن كنا نشوف شاب حتى لو عايش في دور الصايغ يشرب سجاره
قدام والده او حتى قدام حد كبير من عيلته يعنى بيشر ب سجاير والكل عارف لكن لايمكن
يتجرأ ويولع سيجاره وهو قاعد في وسط عيلته

مثلا كان الواحد لما يجب يطلب حاجه من حد لو ما قالش من فضلك قبلها يبقى في منتهى الوقاحه
كان الى ماشى في اى مكان لازم يرمى السلام على الى قاعد وهو مبتسم كانت الناس بتسال عن
بعض وبتود بعض بدون مصلحه مش ممكن تطلع الاتوييس وتلاقى راجل قاعد وواحد ست واقفه
استحاله محاله بمجرد ما ست او بنت تركب الاتوييس لازم واحد يقف ويقعدها

ما تلاقيش السواق لو حصل اى حاجه في الطريق يطلع يشتم من العرييه لا تلاقيه بيقول للتانى حد
بالك كنت هتضيغنا ربنا يستر طريقك كان بيدعيه زمان مش بيدعى عليه

كنت تدخل المحل تلاقى البياع مبتسم ويساعدك لحد ما يجيبك طلبك بدون ملل واحتمال تحس انه
بقى فرد من العيله من كتر ماهو بيقوليك ايه الكويس من الوحش وايه العيب في البضاعه وايه النوع
الكويس كانت الامانه طاغيه عن حبه للمكسب ..ويمكن عشان كده ربنا كان بيبارك لهم في الرزق

كنت فين وفين لما تسمع عن حوادث السرقة ..ويمكن يعدى سنه واتنين عقبال ما نسمع عن جريمة
قتل مثلا والناس تقعد تتحاكى عليها سنين ماهى حاجه نادر حصولها كان كل حاجة حلوه ورايقه ..

الحب بين الناس كان جامد جدا الصاحب بيحب صاحبه بجد مش بيعرفه لمصلحه شخصيه صاحبه
كانها اخت مش ممكن تلاقى واحده بتكلم عن صاحبها وحش الناس كانت بجد اخلاق

طبعاً مش عاوزه اقولكم ناووووووووووو ايه الى بيحصل

كلنا عايشين هذه المأساه ... كنا عايشين زمان بالاخلاق الحميده دلوقتي الاخلاق ماتت وحميده
فتحت شقه مفروشه

كل حاجه بقيت ما فيهاش اخلاق .. ما بقاش فيه كسوف زى زمان دلوقتي تلاقى الولد واقف فى
الشارع بيعاكس جارتة بابشع الالفاظ .. ولا عامل حساب للجيره

تلاقى البنات ماشيين فى الشارع صوت ضحكهم جايب للاخر الشارع .. وممكن يعاكسو الشباب
عادى جدا الكسوف وحمرة الخجل اتدارت بروجاجو بيحطوه على وشهم

تلاقى الواد ابن امبارح وبياخذ مصرووفه لسه وبيتكلم بمنتهى السفاله مع باباه واماماته وممكن
يزعقلهم ويغلط فيهم وتلاقيه بيشرب سجاير وهو عمره ١٤ سنه قدام باباه عادى .. ولو قولتله
كده غلط او عيب يقولك احمد ربنا انت شايفينى بشرب مخدرات بقت السجاير دى حاجه عاديه
دلوقتي

زمان لو شوفنا موقف مش كويس فى التلفزيون بنغطى عيننا او نطفى التلفزيون مثلا دلوقتي ده بقى
عادى ولو اتكلمت يقولك خليكى ايزى البجاحه بقت عينى عينك ..

الله يرحم دى ايام لما كانت الشتمه عيب دلوقتي تلاقى الشباب بيشتمو بعض باقدر الالفاظ
بتهرج مع بعض وممكن يهرجو مع بعض بسيرة الامهات والاخوات عادى ماهو تهريج

الحياء انعدم والنحوه اخدت اجازة .. بقينا نلاقى البنات بتتكلم وتقولك لاصح وانجز هو احنا
مش هنتصاحب ولا ايه تلاقى البنت بتعرفك على شاب وتقولك ده (البوى فريند) بتاعى ومامى
وبابى عارفين والولاد الى ما عند هوش ٢ او ٣ (جيرل فريند) يبقى ولد خام مش مدردح ما يلكولش
مع البنات

لو اضطرت واحده تركب موصلات او المترو تلاقى المترو كله ستات واقفه وممكن تبقى حامل او

شايه على ايدها طفل وما فيش بنى ادم يهز طوله ويقولها تعالى اقعدى ما بقناش نسمع كلمة من فضلك ولا لو سمحت مثلا .. تقريبا اتشالت من القاموس خلاص وبقي فيه لغة غريبه الناس بتكلمها نص مفرادتها ولا مؤاخذه قبيحه ..

مباقاش فى كسوف من اى حاجه كل حاجه بقيت على عينك يا تاجر السفاله بقت سمة العصر للاسف ولما نلاقى حد عنده نخوه واخلاق بقينا بنستغربه انا فاكره ان مره وانا ماشيه بالعريه شوفت ولد بيزنق على بنت بالعريه بطريقه مستغزه جداا ولما بنت قالته احترام نفسك وقف يضحك كانها قالتله نكته مثلا والناس بيتفرجو عليهم ..

كأن كلمة الاحترم بقت غريبه عننا نفسى اعرف ليه .. ليه الشتيمة بقت لبانه فى بق الناس ليه النداله بقت هى العمله المتوفره دلوقتى ليه سوء النيه بقى بيجرى فى دمنا مجرى الدم ليه الكذب بقى العادى بتاعنا راحت فىن اخلاقنا .. ليه ما بنلتزمش بتعاليم دينا

ده حتى الدين بقت ناس بتاخده كستار لافعالهم الدينيه

ليه ما نرجعش زى زمان للطيبه وحسن المعامله والكرم والشهامه والرجوله والنخوه والاخاء

ولا بجد محتاجين نقول للزمان ارجع يا زمان يمكن ترجعلنا اخلاق زمان

زمان واحنا صغيرين - هناء محمود

زمان واحنا صغيرين كانت تحكيلنا ماما قبل النوم حكاية الشاطر حسن والأميرة سندريلا وذات الرداء الأحمر حكايات كلها حب وخيال ونصحى الصبح نسمع فى الراديو حكايات أبله فضيلة طبعاً مش هقول مين فاكر أبله فضيلة لأن بيتهيألى مفيش صغير ولا كبير ميعرفش مين أبله فضيلة , وكلنا حافظين أغنياتها المشهورة يا ولاد يا ولاد تعالو تعالو

بس هسألکم فاكرين إحساسنا زمان واحنا بنسمع حكايات أبله فضيلة فى الراديو , فاكرين صوتها الجميل اللى مكنواش بنسمعه .. لأ .. دا احنا كنا بنحسه وبنشوفه وهو بيضحك فى ودانا ..

فاكرين حكاياتها اللي اتربيننا عليها وكنا بنتخيل كل كلمة وحركة بتقولها وكأنه برنامج تيليفزيون مش راديو , وكلمة (حلوين) و (شطار) إلی كانت بتكررها كثير في وسط كلامها بكل حنيه ورقة , كانت بتدينا شحنات إيجابية متوصفش , كانت تحكيلنا دائما عن الشاطرين وعن الحلوين وعن المثاليين ولو كان في الحكاية ولد مش شاطر أو شقى مكنتش تتمادى في وصفه أوى علشان منتعلمش منه بس تحذرنا من أفعاله بمنتهى الحكمة والبساطة , فاكرين أغنية كل حلقة اللي كنا بنستنا نسمعها بعد الحدوتة ما تخلص , أنا لسه فاكرة أغنية (على عيلوة ياللى ضرب الزوميرة ياللى وأنا قلبى قالى قالى إن احنا هنبقا أصحاب من غير ما نهد حيطة من غير ما نسد باب)

الله على دى أيام .. الحكايات دى هي اللي ربتنا يمكن أكثر من أبونا وأمنا , كان كلامها وأغانيها محفورة في قلوبنا , أنا لسه لحد دلوقتي بدور على الحكايات دى وبسمعها تانى وأسرح بخيالى معاها ومع ذكرياتى وأنا قاعدة مع ماما في المطبخ وبسمعها , ماهو الراديو كان من أهم مستلزمات المطبخ زمان , الست الشاطرة مكنتش تطبخ إلا على صوت الراديو , علشان كدة كنا حافظين كل برامج الراديو , بس كان أهم برنامج عندنا واحنا أطفال هو أبله فضيلة وبدون منافس ..

زمان كان اى برنامج أو مسلسل سواء إذاعى أو تيليفزيونى موجه للطفل كان مدروس ومحكوم بقوانين من أهمها لا للعنف , علشان كدة كنا أطفال هادين ومختلفين , كان بالنسبالنا مازنجر هو مسلسل الأكشن بتاعنا , لما كان ماهر بعلو صوته يقول الشعاع المدمر .. القبضتين القاطعتين .. الشعاع الجليدى وإحنا بقا نمثل الحاجات دى بعد ما نتفرج , أنا أعمل مازنجر وأختى تعمل فاتن والتلاجة هي الوحش اللي بنحاربه , كنا بننطرد طبعا من المطبخ أشر طاردة بس عادى هنتصرف لو مكنتش التلاجة بيقا الدولاب , إحنا كنا جيل خيالنا واسع علشان كل حاجة حوالينا سواء كنا بنشوفها او بنسمعها كانت بتساعدنا على كدة

كنا بعد ما نتفرج على أليس في بلاد العجائب نروح في عالم تانى من الخيال نفضل نشغل دماغنا ونفكر في اللي شوفناه , إنما دلوقتي فيلم الكارتون يخلص من هنا وتلاقى الأطفال دوروا ضرب في

بعضهم متفهموش ليه , اللي ليه أخ يضربه واللى ملوش يروح يضرب فى ابن الجيران ولما تيجى
تزعيلهم يقولوا إحنا بنلعب يا ماما , دا لعب ايه المهيب ده ؟

ماهو مش ذنبهم دا ذنب الأفلام والمسلسلات الكرتون الغربية اللي بيتفرجوا عليها , اللي كلها
عنف وضرب وقتل , بقا هى دى برامج أطفال يا ناس , الأطفال بقوا من كتر ما تعودوا على
المنظر دى بقا الابن يقعد جنب أبوه وهو بيتفرج على نشرة الأخبار ويضحك ويشاورله
هههههههههههه شوفت يا بابا الراجل المقتول , عادى جدااا واحنا زمان لو شوفنا بس واحد صوباعه
متعور منعرفش ننام أسبوع

لا ومش كفاية مسلسلاتهم وبرامجهم وقنواتهم اللي لا تعد ولا تحصى اللي أغلبها ببيوظ عقولهم
ويوقف تفكيرهم ويعلمهم العنف , لا دا كمان فى أمهات بيقتعدو عيالهم يتفرجوا على المصارعة الحرة
, تلاقى الطفل عنده ٥ سنين وعارف كين وأندرتيكر وجون سينا , ويروح الحضانة يضرب أصحابه
ولما تساله الميس إنت ليه عملت كدة ؟ يقولها دانا كنت باخده لمس أكتاف يا ميس .

على ١٠ سنين كدة بيدأ الطفل يتفرج بقا على أفلام الأكشن والرعب والإثارة , فى وجود بياه
ومماته عادى , وتيجى الأم تسأل وتستغرب وتروح لدكاترة وتشتكى أنا ابني عنيف وعصبي
وعدوانى ليه؟؟ ياااا شيببيخة

كل ده ولسه بتسأل ليه ؟

داحنا أهلينا مكنوش بيرضوا يخلونا نتفرج على الأشكيف اللي كان بيحكي فى ألف ليلة وليلة زمان
وانتوا سايبين ولادكو كدة عادى رعب يتفرجوا أكشن يتفرجوا

حتى الكرتون أهى الأم بتحط ابنها قدام فيلم الكرتون أيا كان بيحكي عن ايه ولا بيتكلموا فى ايه ؟
المهم ان ابنها ساكت وسايها تشوف شغل بيتها بمدوء , وبعد كدة يحصل ما لا يحمد عقباه

أنا عارفة انه صعب على اى أم وأب يقعدوا مع أولادهم ويتفرجوا على كل حاجة قبل ما يشفوها ,

هو مش صعب بس دا بقا مستحيل فى زمانا ده , من كتر عدد قنوات الأطفال وبرامج الأطفال
ومسلسلات الكارتون

بس نحاول نعمل اللي علينا على أد ما نقدر , الأطفال دول مستقبلنا ومستقبل بلدنا , وبكرا
هنحصد الى زرعناه فيهم , سواء حلو أو وحش

نفسى كل حاجة تبقا موجهة للأطفال تكون مدروسة زى زمان , علشان بدل العنف والعصية
والتطرف نعلمهم الحب والخير والفضيلة

آآه الفضيلة , ربنا يديكى الصحة وطولت العمر يا أبله فضيلة , اطفال مصر محتاجينك بجد , لا لا
مش أطفال مصر بس , دول الكبار كمان , محتاجين تقرصيلهم ودانهم بخنية وتفكريهم يعرفوا يربوا
ولادهم ازاي على الفضيلة ويسمحولهم بيايه ويمنعولهم عن إيه ؟ , محتاجين كلامك الحلو وحكايتك
المهادفة وأغانىكى الجميلة

.. حلوين .. وتوتة توتة خلصت الحدوتة حلوة ولا ملتوتة

بالنسبالي قمة الاحتراف

كنا نمشى فى الشارع آخر أيام رمضان نشم ريحة الكحك طالعة من كل مكان , ومنقدرش ننسى البسكوت والبيتيفور والغريبة كان ليهم قاعدة لواحدها دا شئ أساسى

قبل العيد بقا بيومين نروح عند العطار أنا وماما نشترى الترمس الحلو والسودانى والحلبة الحصى , أيوة الحلبة الحصى كنا بنعمل بيها الحلبة المنبته , هقولكم بتعمل ازاي انتوا أكيد مش عارفين ولا فاكرين .. كنا ننقع الحلبة فى الماية طول الليل وتانى يوم نصفيها ونحطها فى قماشة بيضة وكل شوية نرش عليها حبة ماية لحد ما الحلبة تنبت

وليلة العيد بقا بعد ما ننصف البيت مع ماما وكله بيقا تمام , نجيب صينية ونحط عليها طبق الترمس اللى عليه شوية شطة ولمون وجهه طبق السودانى الخمص وطبق الحلبة المنبته , ونجيب صينية تانية نرص عليها الكحك ونرش عليه السكر السترافيش ونوزع جمبه البسكوت و الغريبة والبيتيفور ,
الله على دى أيام

ونترل بسرعة فى الشارع نتفرج على بتاع المراجيح وهو بينصب المرجيحة القارب وبيركب الزوقزيقة والبياعين اللى جايبين لعب العيد ويرصوها المسدسات والعرايس والقرد أبوظبله والزامير والبلونات

ونرجع تانى البيت علشان نستحمى بقا حماية العيد وننام واحنا حاطين جمبنا هدوم العيد وجزمة العيد كمان فوق السرير ومش مصدقين امتى النهار يطلع علشان نصلى العيد وناخد العيدية ونلعب بالمراجيح

نصحى الصبح على صوت صفاء أبو السعود وهى بتغنى أهلا أهلا بالعيد مارحب مرحب بالعيد هيبه هيبه هيبه

متتخيلوش الأغنية دى كانت بتعمل فينا ايه ؟ فرحة العيد عمرها ماكانت تكمل غير بيها ,

وخصوصا سعد نبيهه أنا كنت متخيلة إني كنت الطفلة الوحيدة اللي فاكرة سعد نبيهه ده راجل
إكتشفت بعد كدة ان أطفال مصر كلها كانوا زي بس لما كبرت فهمت انها كانت تقصد سعدنا بيها
اللي هي ليلية العيد يعنى , معلى بقا سداجة طفولة

كل اللي فات ده كووم والعيدية كووم تانى , إحنا كنا نصحى الصبح نقف طابور علشان بابا يوزع
علينا العيدية نسيب بابا ونروح نعمل طابور عند ماما فى المطبخ وناخد بردو عيدية , وهوب بقا على
بيت جدى ونفس الطابور بس العيدية أكبر طبعا , جدوا بقا , وناخدها كعب داير على بيوت العيلة
والجيران قال يعنى رايحين نعيد عليهم واحنا أصلا رايحين نلم فى العيديات لحد ما يجى آخر اليوم يبقا
مع كل واحد فينا كتر عبارة عن جنيهاات ورق جديدة بتلمع كان ليها فرحة تانية خالص

ونروح تانى يوم بقا نشترى اللي على مزاجنا عروسة بلاستيك أو القرد أبو طيلة أو صياد السمك
والأولاد بقا يشتروا رششات ومسدسات خرز وبومب وصواريخ وطول العيد ينشئنا علينا
ويفرقوا الصواريخ تحت رجلينا و كنا نصرخ بس قلوبنا بتضحك كان أحلى عيد فى الدنيا
العيد أيام زمان كان هاند ميد , كنا بنعمله بإيدينا بكل تفاصيله علشان كدة كانت فرحتنا بيه أكبر
بكثير من دلوقتى

دلوقتى بقا نادر أوى لو حد عمل كحك العيد فى بيته أو يمكن مبقاش حد يعمله فى البيت خالص ,
كله بيشتري جاهز وطلعت أشكال كتير من الكحك , كحك بالمكسرات ومعمول بالعجوة ,
وكحك بالشيكولاتة إختراعات جديدة حتى لو غاليه وطعمها حلو بس مش بجلاوة الكحك أبو ملبن
بتاع زمان اللي معمول فى البيت , لأن اللمة والبركة بتخلى لأى شئ طعم تانى

وزى ما راح طعم كحك العيد بتاع زمان , مبقاش للعيد نفسه طعم زمان , الناس بقت تحتفل بيوم
الوقفه أكثر من العيد نفسه يسهروا طول الليل ويخرجوا فى الشوارع ويتفسحوا , وكتر ألف خيرهم
لو فضلوا سهرانين لحد ما يلحقوا يصلوا صلاة العيد ويروحوا على البيوت يقفلوها وينامو لحد
المغرب , وهو دا بقا العيد ؟ محدش شاف عمكو عيد يا ولاد ؟ دا كان المفروض جاى النهاردة ؟ هو

ايه اللى حصل ده ؟, لما كل البيوت قافلين باهم ونايمين يوم العيد بيقا هترور بعض أمتى وفين وهنعيد
على بعض ازاي ؟

وبالليل بقا الأب والأم ياخدو اولادهم ويروحوا الملاهى يلعبوهم شوية وخلاص على كدة كل سنة
وانتوا طيبين خلص العيد .

اه يا غلابة يا انتوا يا أطفال دلوقتى , انتوا بجد محرومين مشفتوش حلاوة عيد زمان وجماله مدفتوش
كحك زمان ولا ركبتوا مرجيحة زمان , احنا كنا محظوظين أكثر منكم بكتير بس معلش تتعوض
كل سنة وانتوا طيبين وصيامكم وقيامكم فى رمضان مقبولين وبالعيد والكحك متهنين , ويكون
عيدكم دلوقتى أحلى عيد بس يارب تدوقوه بطعم زمان علشان بيقا بجد علينا وعليكم سعيد

وفى الختام ...

قالوها أهل الفن زمان .. عاوزنا نرجع زى زمان .. قول للزمان ارجع يا زمان
بس زمانكم ولا وكان .. واتبقى لينا منكم ذكرى .. حكايات بنرسم بيها فكرة .. ونلون بيها
سكك بكرة .. علشان ندور على الانسان
بنحكي عنكم لأولادنا .. يمكن حكاية تفهمنا .. ليه بقينا فى غير الدنيا .. ومشتاقين لعروسة وحصان
ومهما رجعنا اللى كان .. قلوبنا لأيامكم بتحن
هتفضلوا انتو ناس زمان .. واحنا ناس آخر زمن

*** تمت بحمد الله ***



لغز في حياتنا مشد قادرين نفضهم , الدنيا بتمشى بينا لقدام
وعقولنا بتفكر دايم في الله كان
ريحه الماضي حوالينا
أصوات ضحك طفولتنا لسه في ودانا
مطعمنا شوفنا إختراعات وافتكاسات , ونت وشات
لسه العروسة القماش ليها تأثير السحر علينا
لسه الفانوس أبو شمعة هو فرحة رمضان
لسه فاكهة حكايات جدتي
وسامعة صوت الشتا من ورا الشباك , وانا نايمة في حضنها
فرق كبير بين زمان ودلوقتتي
الله عايش دلوقتتي شاف حاجات كثير اور في الحياه
بسد الله عاشد الحياه بجد عاشها أيام زمان

**هنشوف مع بعض بالتفاصيل .. الفرق بين الجيد والجيد
في زمان اند ناو**



**إهداء خاص للفنانة الجميلة
والإنسانة الرائعة نشور مصطفى
كان أدائك الرائع وروحك الجميلة
بمثابة القلب النابض لتلك الكلمات**

البرنامج الإذاعي زمان اند ناو - رمضان 2014 - راديو مصر